

## **KIG BIWASAN dini Juan**

Mendadi ki sinulat kini, iin su pinita' ni Isukristu ditu sala tawan sakupen, ngalanen si Juan. Su nda' pa paita' diniin ni Isus, si Juan, inutidan dig daan benwanen dayun piated nu gubirnu ditu sala maika' pulu'. Su gendawan kiin, sug launan benwa ditu dapit, daansama' linumpakan nu nga getaw Roma. Mikedaag su nga getaw Roma, kaas su gadi' nilan ditu syudad Roma, miglegadi' dig liwenagan benwa. Naa, duuni gendaw mibaal nu gadi'ig begu bala'ud, subay daw iin laaki pektemuyen, su da laak gadi' kiin. Naa, su nga sakup ni Kristu, kagina mituudan ilan dun si Kristu laaki Tampusan Diwata, mimilas ilan ditug bala'ud kia. Melaun dayun dinilani piglegetan. Iini mibianan nu pitu buuk pikumpungan nu nga sakup ni Kristu ditug benwa Asia. Ki sinulat kini, piwitan dun su pitu buuk pikumpungan kia, adun mpengamu' ilan sampay mpenguliksegan ilan dumunut dini Kristu. Si Juan kiin, su saananen ditu maika' pulu', iini pinita' diniin ni Isus.

Dini sinulat kini, sinulat ni Juan sug launan pinita' diniin ni Isus. Minita' ni Juani melaun mekesalebu' pinggulaula ditug langit sampay dinig lumbang. Melaun meliget pelabu'. Melaun dademai suminakup dini Kristu gempagen gu-piai kesalig nilan. Katapusanen, pinita' ni Isus dini Juan sug Begu Syudad Jerusalem, luminu-

sad dig begu lumbang genat ditug begu langit. Naa diag begu syudad, nda'iduni melegenan, nda'iduni melaat, sampay nda'iduni gebii, pu' dia lelayun su Megbebaya'.

<sup>1</sup> Mendadi, mibetang di sulat kini sug biwasan ni Isukristu. Kig biwasan kini, pisalig nu Megbebaya' dini Isukristu, adun paita'en dinita nga sakup nu Megbebaya' dinig lumbang kini. Iinig biwasanen, su sungu mpenggulaula. Kaas sinugu' ni Kristui sesugu'enen getaw langit mekpetenday dinaan, sesugu'enen dadema, ngalan ku si Juan. <sup>2</sup> Mendadi su kelaun minita'u, sinulatu, su tinalu' nu Megbebaya', su metuud inukit dadema ni Isukristu. <sup>3</sup> Naa, ki sinulat kini, adin su megbasa dun sampay su mekineeg di titulu'an kini misulat pedaan di gempenggulaula lema' denlag muka' mekpetuud di tiba'an misulat di sulat kini, iini leliagen gupia. Pu' sungu na mpenggulaulaig launanen kini.

### *Su Kepedial tu Pitu Pikumpungan nga Sakup*

<sup>4</sup> Naa, naan si Juan, piwitan ku amu sulat, yamu nga pitu pikumpungan nu nga sakup ni Kristu diag benwa Asia. Penenebiin ku mbianan amu tulung muka' pianan ginaa. Megbegay dun su Megbebaya', su tetubu' nandaw, su tetubu' dengantu sampay su metua' pa. Megbegay dun dadema su pitu tawan sesugu'en nu Megbebaya' megabang diniin dia gedapan nu melengas gingkudanen. <sup>5</sup> Megbegay dun pa pagid si Isukristu, su meseligan megukit, su penganay Bata' nu Megbebaya' pitubu' puli',

su meglekaunutan di nga gadi' dinig dibabaw lumbang.

Kini si Isukristu, pitail ita niin, muka' miksekat di kepatayen, ginawen ita niin di ginukuman dinita puun tu sala' ta. <sup>6</sup> Pinungun ita niin di Keglekaunutanen muka' tindu' ita niin belian, adun mektamuy ita tu Megbebaya', su Gama'en. Subay pegbesaan si Isukristu muka' meglekaunutan dadema iin di nda'i gikteben! Amen.\*

<sup>7</sup> Pektaltenay niu ini! Si Isukristu, metua' pa, peglidungan nu nga gabun. Mekaita' dun sug launan getaw, sampay su migilek diniin. Melegenan gupia su nga getaw dig lumaun bansa mekatag dini Isukristu. Amen!

<sup>8</sup> Kali' pektalu' su Kaunutan Megbebaya', su Tampusan Ginuungan, "Naa naan, su nda'idun pai mibaal, daan nau. Muka' sa' megela' na mpapas sug launanen, kini pau gusay." Pu' iini tetubu' nandaw, tetubu' dengantu, sampay metua' pa.

### *Su Kekpaita' ni Isukristu dini Juan*

<sup>9</sup> Naan kini si Juan, su mimated diniu, muka' duma niu di kelegenay mbianan nu nga miksalabuuk dini Isukristu. Samasakup dau dema niu di Keglekaunutanen. Puun tu keksalabuuk ta dini Isukristu, mekektigel ita di mbianan ta. Naa naan, inutidanu ditug daan benwau muka' miatedu dini pulu' ngalanen Patmos, saba' nu kegukitu talu' nu Megbebaya' muka' su metuud

---

\* **1:6** 1:6 Kig Amen kini, penggelal nu getaw Judea, ma'ananen, Ma'antu, pu' pingaku' di miuna talu'.

ginukit ni Isukristu. <sup>10</sup> Mendadi duuni gendaw, mitaang tu gendaw pegbasa tu Kaunutan, mingapu' dinaan sug Balakat nu Megbebaya'. Midengegu dayun dia teliudan kui mesekeg talu' metenug ma'niin nug bugyung. <sup>11</sup> Kali' pektalu', "Kini mpaita' dini'a, sulat mu, dayun mu puitay dun su pitu buuk pikumpulan nu nga sakupu ditug Efeso, ditu Smirna, ditu Pergamo, ditu Tiatira, ditu Sardis, ditu Filadelfia sampay ditug Laodicea."

<sup>12</sup> Kali'u luminingay, adun guguden ku sa' ta' taway duni pekabit dinaan. Masi' iini minita'u, pitu buuk betangan sulu', lumbus bulawan. <sup>13</sup> Duun dademai pegindeg dia titenga' nu ngag betangan sulu' ma'niin palas kilawan, silukeni suub midepet di pelapanen, muka' bikesani gegdeben bakes bulawan. <sup>14</sup> Gemputi'ig buuken, ma'niin nu gemputi' gupia penepeten atawaka ma'niin nug dupi' batu. Ki matanen pagid, maa' liga' gapuy. <sup>15</sup> Ki geksudén, ma'niin nug bedunsi iknasan sampay metinggas gupia, pu' tiniti' di gapuy. Ki tingegen, ma'niin tubig megdeguk, sa' metaas gupia baga. <sup>16</sup> Piguidaneni pitu buuk bitun dig lintu kemetén, muka' dig baba'en mikseleputi sundang dua'ig baba'en. Su mulu'en, mekesulaw, ma'niin nu mata gendaw sa' taasendaw. <sup>17</sup> Sa' minita'u iin, mikeglaubu dia mesungu'anen, ma'niinu daan na minatay. Laak dagid dipenanu niin dig lintu kemetén, kali' pektalu', "Ndi'a mendek. Naan ki pikpuunan nug launan. Naan su katapusanen dadema. <sup>18</sup> Naan pa pagidi tetubu'. Minayan nau matay tu'u, laak bentayay mu pa daan, tetubu' dau

muka' ndi' nau puli' matay! Megbaya'u di gumul getaw muka' ditug baya', su pegbenwanan nu nga mimatay. <sup>19</sup> Naa, ki kelaun maita' mu kini, ki mpenggulaula nemun muka' su sungu mpenggulaula, sulat mu. <sup>20</sup> Buasan ku na dini'a sug daansama' pigbuni. Kinii gulugan nu pitu buuk bitun minita' mu dig lintu kemetu muka' su pitu buuk betangan sulu' bulawan. Su pitu buuk bitun, iin su nga sesugu'en nu Megbebaya' getaw langit megingat tu pitu buuk pikumpungan nu nga sakupu. Su pitu buuk betangan sulu', iin su pitu buuk pikumpungan nga sakupu."

## 2

### *Su Pemuun tu Pikumpungan ditug Lunsud Efeso*

<sup>1</sup> Kali' gusay pektalu' si Isus, "Mendadi ki pikumpungan nu sakupu diag Efeso, puitay mu sulat su sesugu'en nu Megbebaya' getaw langit megingat dun. Iini sulat mu, kinii pemuun nu megawid di pitu buuk bitun dig lintu kemetu muka' megleketas di pitu buuk betangan sulu', lumbus bulawan. <sup>2</sup> Naa, misuunan ku su pinggulaula niu, sa'itada sug lesayan niu muka' su kektigel niu di kelegenay. Misuunan ku dadema pu' mpauk amu gupia ditu nga melaat getaw, piksima' niui gulaula nu nga getaw paingalan nilan dun sug lawas nilan peneligan ni Kristu asa kana', kaas misuunan niu belusen ilan gupia. <sup>3</sup> Mikektigel amu daan di nga kelegenay niu puun di kesakup niu dinaan, muka' nda' amu dema lukas dun. <sup>4</sup> Laak dagid duuni pegdena'en

ku diniu. Kiin, su kepetail niu dinaan nemun, kana' na maa' nu kepetail niu dinaan dengantu. <sup>5</sup> Kaas, pegdelendem niu gupia su kebagel nug bekna kepetail niu, muka' su kelukas niu na dun. Peksikesuun amu gusay muka' penggulaulaay niu su maa' danug bekna pinggulaula niu. Sa' pinenggi' ndi' amu gusay meksikesuun, medituunu niu, adun ua'en ku sug betangan niu sulu' ditu kibetanganen. <sup>6</sup> Laak duun dademaig leliagenu dun diniu, pu' mpauk amu gupia ditu nga gulaula nu nga sakup ni Nicolas, maa' danu kepauku dun dadema.

<sup>7</sup> “Naa, adin sug duuni telinganen, mekineeg dema tu'u di telu'en kini nug Balakat nu Megbebaya' tu nga pikumpungan nga sakupu. Adin su nga mekegdaag di melaat, begayu dinilan meka'aan ilan dig bunga gayu megbegay ketubu' nda'i tamanen, su gayu pimula dia Pegimulanen nu Megbebaya'.

### *Su Pemuun tu Pikumpungan ditug Lunsud Smirna*

<sup>8</sup> “Mendadi ki pikumpungan nu sakupu dia Smirna, puitay mu sulat su sesugu'en nu Megbebaya' getaw langit megingat dun. Iini sulat mu, kinii pemuun nu pikpuunan nug launan muka' katapusanen dadema, su minatay dayun mitubu' puli'. <sup>9</sup> Naa, misuunan ku su kelegenay niu muka' su kepubri niu, asa medatu' amu gupia. Misuunan ku pa padun su nga pembaalbaal mekatag diniu nu nga megangken pu' getaw Judea ilan, laak kana', pu' masi' sakup ilan tantu ni Satanas! <sup>10</sup> Naa, ndi' amu gusay mendek ditu

sungu niu mpenggulaula. Pektalentenay niu ini, duun diniui pepirisuun nu Palin, adun pengindanan amu, ki kelegenay niu gikteb sepulu' gebii. Subay meseligan amu pia petain amu, saba' nu kesalig niu dinaan. Begayu dayun diniu su tunde' gadi', sa'itada su ketubu' nda'i tamanen.

<sup>11</sup> “Naa adin sug duuni telinganen, mekineeg dema tu'u di telu'en kini nug Balakat nu Megbebaya' tu nga pikumpungan sakupu. Pu' adin su mekegdaag di melaat, ndi'en mbianani kedua' kepatay, su kepatay nda'i tamanen.”

*Su Pemuun tu Pikumpungan ditug Lunsud Pergamo*

<sup>12</sup> Laung padun ni Isus, “Mendadi ki pikumpungan nu sakupu dia Pergamo, puitay mu sulat su sesugu'en nu Megbebaya' getaw langit megingat dun. Iini sulat mu, kinii pemuun nu megawid di mauteng gupia sundang, dua'ig baba'en. <sup>13</sup> Naa, misuunan ku pu' su pegbenwanan niu, ditu keglekaunutan ni Satanas. Laak pia ma'antu, meseligan amu, nda' niu teliuday ki kesalig niu dinaan, pia pa su kepatay ni Antipas kiin, ki meseligan megukit talu'u, pu' iin, pinatay ditug benwa pigbenwanan ni Satanas. <sup>14</sup> Laak dagid duuni maika' pegdena'en ku diniu. Duun diniui munut tu pitu'un ni Balaam dengantu. Si Balaam kiin, pitu'unanen si Balak megdaang di nga getaw Israel, adun mekesala' ilan, pu' ma'aan daw nilan sug betang ginilak tug ledawan muka' mesu'at ilan daw megdusa. <sup>15</sup> Ma'antu dadema duun diniui santa' tawan duminunut ditu

titulu'an nu nga sakup ni Nicolas. <sup>16</sup> Kaas teliuday niu su nga sala' niu! Pu' sa' pinenggi' ndi' amu gusay meksikesuun, laawan ku amu sungu, dayun bunu'en kui nga getaw kia sundang dua'ig baba'en, mikseleput dig baba'u.

<sup>17</sup> “Naa adin sug duuni telinganen, mekineeg dema tu'u di telu'en kini nug Balakat nu Megbebaya' di nga pikumpungan sakupu. Adin su mekegdaag di melaat, begayu dun su gaan giglud ditug langit, piningalan dun manna. Begayan ku padun diadia gemputi' batu sinulatan begu ngalan, ki nda'iduni mekebasa dun, subay su laak mekedawat dun gupia.

*Su Pemuun tu Pikumpungan ditug Lunsud Tiatira*

<sup>18</sup> “Mendadi ki pikumpungan nu sakupu dia Tiatira, puitay mu sulat su sesugu'en nu Megbebaya' getaw langit megingat dun. Iini sulat mu, kinii pemuun nug Bata' nu Megbebaya', maa' nu pegliga' gapuy su matanen muka' maa' danu metilak bedunsi su pelapanen. <sup>19</sup> Naa, misuunan ku su kelaun penggulaula niu. Misuunan ku dadema su kepetail niu muka' su kesalig niu dinaan, su gabang niu di nga samasakup niu muka' su kektigel niu di kegleget diniu. Misuunan ku pa padun pu' melengas pa dun su penggulaula niu nandaw ditu pinggulaula niu dengantu. <sup>20</sup> Laak dagid duun dademai pegdena'en ku diniu, pu' nda' niu pemaagayig libun kiin si Jezabel. Iin, paingalanen dunig lawasen pimuunan nu Megbebaya', laak piktu'unanen su nga sakupu sampay duuni pegdaanganen, adun megdusa ilan



muka' maan ilan dig betang ginilak di ngag ledawan nu sagya diwata. <sup>21</sup> Naa, miniben ku na pegelatay su kegbiksu' sia nug libun kia di sala'en, laak mpauk gusay megbiksu' di kenlelingayen. <sup>22</sup> Kaas pegduksaken ku iin ditug belilidanen sampay sug dumanen minlelingay, sa'itada, pepegleduun ku ilan pati', melegenan ilan dun gupia. Sa' ndi' ilan gusay megbiksu' di melaat gulaula nilan, penggulaulaan ku ini ganam. <sup>23</sup> Tiga'wan, petain ku dadema su nga sakup ni Jezabel. Sa' ma'antu, mesuunan dayun nu kelaun pikumpulan nga sakupu pu' naani mekesuun di ginaa muka' dig delendeman nug launan getaw. Kaas, sugdaan ku amu saladua' mbantang tu pinggulaula niu.

<sup>24</sup> “Laak yamu ngag duma sakupu dia Tiatira nda' mpeduma di melaat titulu'an kia, yamu nu nga nda' dadema petu'unay di medalem laung titulu'an ni Satanas, naa taman talu'u diniu, ndi'u da puit diniu su melegenan amu dun. <sup>25</sup> Iin laak, subay engkemen niu gusay su misuunan na niu sampay matengu puli'. <sup>26</sup> Naa, adin pasi' su mekegdaag di melaat muka' penggulaulaanen gusay su mauya'an ku sampay matengi gumulen, begayan ku iin pegbaya' di kelaun nasud, maa' danu pegbaya' dun mialapu genat tu Gama'u. <sup>27</sup> Metegas dayuni keguiten dinilan, muka' geba'enen su nga nasud, maa' danu melaat gulen buungen nu migbaal dun. <sup>28</sup> Duun dademai begayu di nga mekegdaag, paingalan dun sug bitun pemulaw.

<sup>29</sup> “Naa, adin sug duuni telinganen, mekineeg

dema tu'u di telu'en kini nug Balakat nu Megbebaya' di nga pikumpungan nga sakupu.”

### 3

#### *Su Pemuun tu Pikumpungan ditug Lunsud Sardis*

<sup>1</sup> Laung padun ni Isus, “Mendadi ki pikumpungan nu sakupu dia Sardis, puitay mu sulat su sesugu'en nu Megbebaya' getaw langit megingat dun. Iini sulat mu, kini pemuun nu megawid di pitu tawan sesugu'en nu Megbebaya' megabang lelayun diniin muka' su pitu buuk bitun. Naa misuunan ku su pinggulaula niu. Misuunan ku dadema pu' megdedengeg amu mipeduunan amu begu ketubu' asa ma'niin minatay amu tu'u!

<sup>2</sup> Kaas tanud amu, ektak niui kesalig niu dinaan, adun ndi' niu melenga'an, pu' kaita'u dun di pegita'en nug Diwata pektemuyen ku, nda' pa pengganget su pinggulaula niu. <sup>3</sup> Naa, su titulu'an pitu'un na diniu, pegdelendem niu gupia kampu' nu midengeg niu. Pekpetuud amu dun, teliuday niu su kelaun sala' niu. Sa' ndi' amu meksikesuun, medituunu niu ma'niin nu megdaaw, ndi' niu mesuunan sa' nanuta'u dateng.

<sup>4</sup> Laak dagid duun diniu nga getaw dia Sardis nda' niu begay melema'ay, pia laak su penepeten niu. Tundug amu dinaan pekseluk amu gemptu' penepeten, pu' mbantang amu dun. <sup>5</sup> Adin su mekegdaag, ma'antu dadema peselukan nu gemptu' penepeten, muka' ndi'u eknasen su ngalanen bitang na dig linulun sinulat tanda' milista su ngalan nu kelaun getaw mpeduma di

ketubu' nda'i tamanen. Peglegintuuden ku di gedapan nu Gama'u muka' di gedapan nu nga sesugu'enen getaw langit pu' sakupu iin.

<sup>6</sup> “Naa adin sug duuni telinganen, mekineeg dema tu'u di telu'en kini nug Balakat nu Meg-bebaya' di nga pikumpungan nga sakupu.

*Su Pemuun tu Pikumpungan ditug Lunsud Filadelfia*

<sup>7</sup> “Mendadi ki pikumpungan nu sakupu dia Filadelfia, puitay mu sulat su sesugu'en nu Meg-bebaya' getaw langit megingat dun. Iini sulat mu, kinii pemuun nu meseligan pinaas nu Meg-bebaya', sug bigayan pegbaya' meglekaunutan maa' nu bigay ditu ni David dengantu, iin su mekpuka' di gulu gegdan nda'iduni meketakep dun. Iin pa pagidi mektakep dun, nda'iduni mekepuka' dun. <sup>8</sup> Misuunan ku su penggulaula niu. Misuunan ku dadema pu' pia maika'i megaga niu, pituud niu gela' su titulu'an ku. Meseligan damu dema dinaan. Bigayu na diniui sikawan niu mbaal niu su pibaalu diniu, sikawan nda'iduni getaw mekebelabag dun. <sup>9</sup> Pekineegay niu! Ki nga getaw laung nilan pu' getaw Judea ilan asa kana', belusen ilan sungkin, pu' sakup ilan ni Satanas. Pesempelen ku ilan diniu, muka' pepengemu'en ku ilan diniu. Mesuunan nilan dayun gela' pu' petailen ku amu. <sup>10</sup> Kagina piktalentenan niu su sugu'an ku diniu pu' miktigel amu di kelegenay niu, penendingan ku amu di kelegenay sungu mateng di nga kilawan, adun mpengindanan ku sug launan getaw dinig dibabaw lumbang. <sup>11</sup> Naa sungu nau metua'.

Subay engkemen niu gusay su misuunan niu na, adun nda'iduni mekagaw dun su melengas sugda tu kegdaag niu. <sup>12</sup> Adin su getaw mekegdaag, baalen ku iin gempagen pasek ditug Balay Penedapan tu Gama'u, sug Diwata pektemuyen ku, dayun ndi' nain mawa' dia. Sulatan ku dayun su getaw mekegdaag kia di ngalan nug Diwata pektemuyen ku, muka' su ngalan nu syudad pegbenwanan nug Diwata pektemuyen ku, sug begu syudad Jerusalem lumusad genat ditug langit, genat ditug Diwata pektemuyen ku. Sulatan ku su mekegdaag kia dig begu ngalan ku.

<sup>13</sup> “Naa adin sug duuni telinganen, mekineeg dema tu'u di telu'en kini nug Balakat nu Megbebaya' tu nga pikumpungan nga sakupu.”

*Su Pemuun tu Pikumpungan ditug Lunsud Laodicea*

<sup>14</sup> Laung padun ni Isus, “Mendadi ki pikumpungan nu sakupu diag Laodicea, puitay mu sulat su sesugu'en nu Megbebaya' getaw langit megingat dun. Iini sulat mu, kinii pemuun nu gilal Amen, sa'itada su meseligan megukit, pu' telu'enen su metuud. Iini telu'en nu puun nu kelaun binaal nu Megbebaya'. <sup>15</sup> Naa, misuunan ku su pinggulaula niu. Ma'niin amu nu tubig, kana' amu metegdaw, kana' damu dema mainit, sa'itada, mikagelagel pai kesalig niu. Mauya'an ku mainit amu sungkin atawaka metegdaw. <sup>16</sup> Laak dagid, kagina ma'niin amu nu melebab tubig, lua'en ku amu, belengen ku amu. <sup>17</sup> Laung niu dun medatu' amu, memis dademai kebetang niu sampay nda'i kulang niu. Laak dagid nda'

niu mesuunay pu' mekelelaatilelaat amu gupia. Gempusuk amu, buta damu dema sampay milebasan amu! <sup>18</sup> Kaas titulu'en ku amu, saluy amu dini naan tantu bulawan, adun amu dumatu'. Saluy damu dema gemputi' penepeten, seluken niu, adun metebunan su mekepiidpiid keglebas niu. Saluy amu pa pagid bulung ugid niu di mata niu, adun mekengita' amu. <sup>19</sup> Adin su petailen ku, pemaagen ku muka' titulu'en ku, kaas pektinantu amu muka' teliuday niu su kelaun sala' niu. <sup>20</sup> Bentayay pa daan niu, megindegu di gulu gegdan muka' meksabiu. Sa' duuni mekedengeg di tingegu muka' puka'anen su gulu gegdan, suledu dayun diag balayen dayun ami meksalu maan. <sup>21</sup> Naa, adin su mekegdaag, begayu diniini pegbaya' megabang dinaan meglekaunutan, maa' nu kebegay dinaan nu Gama'u megabang diniin meglekaunutan, pu' naan, mikegdaag dau.

<sup>22</sup> “Naa adin sug duuni telinganen, mekineeg dema tu'u di telu'en kini nug Balakat nu Megbebaya' di nga pikumpungan nga sakupu.”

## 4

### *Su Kektamuy ditug Langit*

<sup>1</sup> Naa tubus nitu, duun na pelumi pinita' dinaan. Iini minita'ui gulu gegdan ditug langit, mipuka'. Muka' ki tingeg maa' nug bugyung midengegu kamun mektalu' dinaan, kali' pektalu', “Diniin ka ditaas, adun paita'u dini'a sa' ta' alanduni mpenggulaula ditug binaya' gebii bu' gendaw.” <sup>2</sup> Sedu'undu'un mingapu' na

dinaan sug Balakat nu Megbebaya'. Minita'uy dayun diag langiti melengas gingkudan gadi', duuni pegingkud dia. <sup>3</sup> Ki pegingkud dia, tumiagi mulu'en ma'niin palas nu metinggas batu piningalan dun haspe muka' kornalina. Milibed di gingkudan kiai melunaw landung ma'niin palas nu sala metinggas batu piningalan dun esmeralda. <sup>4</sup> Duun paig dua' pulu' bu' paat buuk gingkudan gadi' miktabu' di melengas gingkudan gadi' kia. Pemegingkud diaig dua' pulu' bu' paat tawan meglegulang kaunutan piselukan gemputi' suub, miktukid ilan tundeke bulawan. <sup>5</sup> Naa, ki gingkudan kia dia titenga', migilat lamug mikpenlugung. Duun pa padun dia mesungu'aneni pitu buuk tilaw peglamag. Ki pitu buuk tilaw kia, iin su pitu tawan sesugu'en nu Megbebaya' megabang lelayun diniin. <sup>6</sup> Duun pa pagid dia mesungu'an nu gingkudan kiai ma'niin palas dagat, ma'niin nu pagalungan saba' ketinawen.

Naa, milibut di melengas gingkudan nu gadi' ki paat buuk tetubu' biwat. Ki ngag biwat kia, diadia mileep dig lawaseni mata, dia gatubanganen sampay dig lekuden. <sup>7</sup> Naa, su palas nug bekna biwat, maa' nug limaung. Su kedua' biwaten pelum, maa' nu turu baka, dayun su ketelunen, maa' nug lakii mulu'en, sampay su kepaaten, maa' nu tipuli peglayug. <sup>8</sup> Diadia duun dademai genem buuk gekpaken. Mileep pa pagid di gekpakeni mata, di dapit dibabawen sampay di dapit silungen. Gebii gendaw ndi' nilan sikpa'an bebatay ini, laung nilan,  
"Ki Kaunutan Megbebaya', su Tampusan Ginu-

ungan, iin, nda'ig lamug dun melaat, pia maika'.

Iin su tetubu' dengantu, tetubu' pa nandaw sampay metua' pa.”

<sup>9</sup> Ki paat buuk tetubu' biwat, pekpenalan nilan dig bebat ki megingkud dia titenga' gingkudan, iin su nda'iduni gumulen. Pegbesaan nilan iin sampay pekpeladpeladan nilan. <sup>10</sup> Sa' megbebat ilan, sug dua' pulu' bu' paat tawan meglegulang kaunutan, menginlulud ilan dia gedapan nu megingkud kia dia titenga' gingkudan, pegbesaan nilan su nda'i gumulen. Tikpu'en nilan su nga tundeke nilan dia gedapan nu gingkudanen. Kali' ilan pektalu',

<sup>11</sup> “Ya'a, Kaunutan nami Megbebaya', pekte-muyen nami ya'a, gembantanga penalan nu ngag launan biwat mu, gembantanga dadema pegbesaan nilan sampay gembantanga meglekaunutan dinilan gela'.

Pu' ya'ai miwat di tiba'an maita' sampay su ndi' maita',

adin sug biwat mu, su gikteb bigayan ketubu', nda'ig lain puunanen, su laak mauya'an mu!”

## 5

### *Pigwekilan Sinulat ki Nati Karniru*

<sup>1</sup> Naa mendadi, diag lintu kemet nu megingkud di titenga' gingkudan gadi' kia, duuni minita'u linulun sinulat. Kig linulun kini, miktimpang sulatay. Su pitu lapis patalen, pideketan pitu kumpelig lunay, adun nda'i mekebembal dun.

<sup>2</sup> Duun dademai minita'u sesugu'en nu Megbebaya' getaw langit ginuungan gupia, miktegas iin sumaak, "Ta' taway duni gembantang meksekat dig lunay kia, adun mbembalig linulun sinulat kini?" <sup>3</sup> Laak dagid di gekleb langit bu' lupa' sampay ditug baya', pia sala tawan, nda'i mibaangan metau megbembal di sinulat kiin muka' megbasa dun sia. <sup>4</sup> Kali'u mesuunay, mikengelawu gupia, pu' nda'idun masi'i mibaangan gembantang megbembal di sinulat muka' megbasa dun. <sup>5</sup> Laak dagid, duuni sala tawan dia nga meglegulang kaunutan miktalu' dinaan, "Ndi'a pengaduy, pu' bentayay pa daan! Ki gilal limaung, su sapu' ni Juda, muka' migdedengeg sapu' dadema ni David, dinaagen na tu'u su nga kuntranen, kaas iinen na tu'ui mekesekat di pitu kumpelig lunay, muka' mekegbembal di sinulat kiin."\*

<sup>6</sup> Iin dayuni minita'u ki Nati Karniru, pegindeg dia titenga' nu gingkudan gadi', pigalidungan nu paat buuk tetubu' biwat muka' nu ngag dua' pulu' bu' paat meglegulang kaunutan. Ki Karniru kini, su palasen, ma'niin minayan na matay. Duuni pitu buuk sungagen, pitu buuk dademai matanen, sa'itada su pitu tawan sesugu'en nu Megbebaya' megabang lelayun diniin sinugu' mangay tu tibuukan lumbang. <sup>7</sup> Mendadi, mikpesempel ki Karniru di gingkudan dia titenga', muka' inalapen sug linulun sinulat diag lintu kemet nu pegingkud dia. <sup>8</sup> Su

---

\* **5:5** 5:5 Danu getaw Judea begudiin sug limaungi tenggi'an di kaunutan meglepengi keguiten di samatawen.



saananen malap dun, su paat buuk tetubu' biwat muka' sug dua' pulu' bu' paat tawan meglegulang kaunutan, mimenlaub ilan dia gedapanen. Miktukid ilan gayepan paingalan dun arpa muka' ya'ung mipenu' pelinan, sa'itada su kenenabi nu nga piglegetawan nu Megbebaya'.†  
 9 Lamug mimegbebat ilan begu bebat, laung nilan,

“Ya'ai gembantang malap dig linulun sinulat, muka' mekesekata di pitu kumpelig lunay pidedeket dun,

Pu' pinataya, muka' puun tu kepatay mu siluyan mu su Megbebaya' nga piglegetawanen.

Ki nga getaw likat mu, genat ilan dig launan bansa, dig launan pikebitan ilan, sakup ilan di tiba'an benwa sampay lumaun nasud.

10 Pigbaal mu ilan sala keglekaunutan, launan nilan, belian mektamuy tu Megbebaya' pektemuyen ta,

muka' meglekaunutan ilan ditug dibabaw lumbang.”

11 Naa, pigbentayan ku na puli', muka' midencegui nga sesugu'en nu Megbebaya' getaw langit, ndi' ilan mbilang saba' nu kelaunen, mabu' labi selaksa' pilu' di selaksa' tawan ilan. Pemegindeg ilan dia pegalidung di ginkudan nu gadi', muka' di paat buuk tetubu' biwat sampay dig dua' pulu' bu' paat meglegulang kaunutan.

12 Memegbebat ilan meketikteg, laung nilan,

“Ki Nati Karniru kini pinatay,

---

† 5:8 5:8 Kig arpa, ginis gayepan duuni kurdasen sugiten nu megayep dun.

gembantang meglekaunutan, medatu', metelisebuten sampay ginuungan.

Gembantang dadema pegbesaan, megdedengeg sampay penalan.”

<sup>13</sup> Naa, midengegu dayun su kelaun biwat dia gekbus langit, kampu' nu ngag bitang diag dibabaw lupa', su ngag ditug baya', sampay su ngag bitang diag dagat, sa'itada su tiba'an biwat di gekleb langit bu' lupa'. Midengegu ilan memegbebat, ma'nini',

“Ki pegingkud dia titenga' gingkudan, sampay ki Nati Karniru kini,

di nda'i gikteben enalen ilan muka' pegbesaan ilan,

di nda'i tamanen megdedengeg ilan muka' meglekaunutan ilan!”

<sup>14</sup> Kali' peksembag su paat buuk tetubu' biwat, “Amen!” Mimeglaub dayun su nga meglegulang kaunutan, muka' pinginlu'udan nilan su pegingkud muka' su Nati Karniru.

## 6

### *Sekaten nu Nati Karniru su Pitu Kumpel Pideket dig Linulun Sinulat*

<sup>1</sup> Mendadi ki Nati Karniru, minita'u dayun iin, peksekatenen sug bekna kumpelig lunay pideket dig linulun kia, muka' midengegu su tingeg nu salabuuk tetubu' biwat, maa' nug delalak. Duuni piktelu'anen, laungen, “Panawa!”

<sup>2</sup> Kali'u pegbentayay, minita'ui kebayu', gemptu' kebayu'. Ki peksakay dun, peguidaneni pana'

muka' bigayan dadema tundek. Iin, mipanaw na tu'u memendaag, nda'iduni dumaag dun.

<sup>3</sup> Naa, sikat na pelum nu Nati Karniru su kedua' pideketen lunay muka' midengegu dadema su kedua' tetubu' biwaten. Duun dademai piktelu'anen, laungen, "Panawa!" <sup>4</sup> Duun dayuni kedua' kebayu'en gumiwa', gempula kebayu'. Ki peksakay dun, bigayan pegbaya' mekpegubat di tibuukan lumbang, adun mekpinetayay su nga getaw. Tinulunan dadema iin gembagel sundang.

<sup>5</sup> Naa sikat na pelum nu Nati Karniru su ketelu pideketen lunay, dayun midengegu su ketelu tetubu' biwaten. Duun pa pagidi piktelu'anen, laungen, "Panawa!" Kali'u pegbentayay, duuni minita'u maitem kebayu'. Ki peksakay dun, miguit timbangan. <sup>6</sup> Muka' duuni midengegu ma'niin tingeg nu getaw genat dia paat buuk tetubu' biwat kia. Kali' talu', "Sendaw mengimbaal, tindanen sala kaltik laak trigo. Sa' su sebadai tindan, telu kaltik. Laak sug lana nu gayu olibo muka' su pegimulanan gubas, ndi' dadema saliba'en."

<sup>7</sup> Naa, sikat na pelum nu Nati Karniru su kepaat pideketen lunay, midengegu dayun su kepaat tetubu' biwaten miktalu'. Duuni piktelu'anen, laungen, "Panawa!" <sup>8</sup> Dayun duuni minita'u kebayu' mimansi'. Ki peksakay dun, paingalan dun si Kapatay, dumanen peksakay si Baya'. Ki peksakay kia, bigayan ilan pegbaya' di kepaat ilasen di nga kilawan, adun pemetain nilani nga getaw pibian di gubat, gunus, leduun sampay ditu mekalig metetubu'.

<sup>9</sup> Mendadi, sikat na pelum nu Nati Karniru su kelima pideketen lunay. Minita'u dayuni gentudan gilak, muka' dia silungen duuni nga gimuud nu nga pinatay saba' nilan megukit tu talu' nu Megbebaya' muka' saba' nu keglegin-tuud nilan tu ginukit ni Isukristu. <sup>10</sup> Ki nga gimuud kia, mimeksay ilan, laung nilan, "Ya'ai ginuungan Diwata! Pinaasa ditu melaat muka' meseligan ka gupia! Saaken nami dini'a sa' maiben mu pa ukumay su nga getaw diag dibabaw lumbang muka' pelebu'ay, sugda tu kepatay nilan dinami." <sup>11</sup> Dayun diadia bigayan mekelambak suub, gemputi', muka' pilali deli' sampay mematayi kelaun sama sesugu'enen muka' mimated diniin maa' nu kibiananen.

<sup>12</sup> Naa, miksekat ki Nati Karniru tu ke'ennem pideketen lunay. Miglinug dayun metikteg, minitemi mata gendaw maa' nu maitem penepe-ten binaal saku, mipulaig bulan ma'niin palas dugu', <sup>13</sup> mimeglabu' su ngag bitun ma'niin bunga igera mipudu sa' dulukan metikteg genus, pia mailaw pa. <sup>14</sup> Dayun malep su tibuuk langit, maa' laak nu papil linulun na. Su ngag bentud muka' su nga pinulu'an, piawa' ilan dig daan kibetanganen. <sup>15</sup> Dayun su kelaun getaw dig lumbang, su nga gadi', su nga kaunutan getaw, su nga kaunutan dadema sundalu, su nga medatu' muka' su nga megbaya' dig duma getaw, sampay su gulipen, sa' su kana' gulipen, migela' ilan memegeglud ditu ngag langeb sampay ditu silung nu nga genduk diag binentudan. <sup>16</sup> Pigbeksayan nilan dayun su ngag batu muka' binentudan, laung nilan, "Yamu ngag batu muka'

bentud, silabu' amu dini nami, tebunay niu ami, adun ndi' ami maita' nu pegingkud tu melengas ginkudan kia nu gadi', muka' adun ndi' ami medekdakan nug lenget nu Nati Karniru. <sup>17</sup> Pu' minateng na su mekesalebu' gendaw pengukuman nilan. Ta' taway dun bai mekegaga dun ini?"

## 7

### *Su 144,000 Tawan Pintu'usan Sakup nu Megbebaya'*

<sup>1</sup> Naa tubus nitu, duuni minita'u paat tawan pelum sesugu'en nu Megbebaya' getaw langit. Ki nga sesugu'en kia nu Megbebaya', diadia pegindeg ditu sala di nga paat sungut nig lumbang kini. Inapag nilan su paat buuk genus dumuluk sia dinig lupa', dig dagat, muka' di nga gayu. <sup>2</sup> Minita'u dademai sala getaw langit, peglentu genat ditu dapit silangan. Iin, peguitenen su pektu'us nu pektetubu' Diwata. Biksayanen su paat tawan getaw langit kia, kig daan na bigayan nu Megbebaya' pegbaya' geba'en nilan sug benwa muka' peglaatan nilan sug dagat. <sup>3</sup> Kali' pektalu' su sala tawan getaw langit kia, "Ndi' pa niu peglaatay sug lupa', sug dagat sampay su nga gayu, subay unaan pa nami tu'usay su gangas nu nga sakup nu Megbebaya' pektemuyen ta, su nga sesugu'enen getaw lumbang." <sup>4</sup> Kali'u medengeg su kelaun nu pentu'usan di tu'us nu Megbebaya' di gangas nilan, iini segatus bu' paat pulu' bu' paat ngibu tawan getaw metenday di nga sepulu' bu' dua' gesalan getaw Israel. <sup>5</sup> Naa pemili'an

ma'nini', duuni selaksa' bu' dua' ngibu tawan sapu' ni Apu' Juda, duun dademai selaksa' bu' dua' ngibu tawan sapu' ni Apu' Ruben, selaksa' bu' dua' ngibu tawan sapu' ni Apu' Gad, <sup>6</sup> muka' ma'antu dademai kelaun nu sapu' ni nga Apu' Aser, ni Apu' Neftali, ni Apu' Manases, <sup>7</sup> ni Apu' Simeon, ni Apu' Levi, ni Apu' Isacar, <sup>8</sup> ni Apu' Zabulon, ni Apu' Jose sampay ni Apu' Benjamin, piksepulu' bu' dua' ngibu ki tinu'usan.

*Su Melaun gupia Getaw Pemekseluk Gemputi'  
Suub*

<sup>9</sup> Tubus nitu, kali'u pegengleng, naa melaun gupia getaw, nda'iduni mekebilang dun. Sakup ilan di tiba'an nasud, dig launan bansa, dig lumaun benwa sampay dig lumaun pikebitan. Mimegingdeg ilan di gedapan nu melengas gingkudan nu gadi', di mesungu'an dadema nu Nati Karniru, lumbus ilan pemekseluk gemputi' mekelambung suub, peguidan nilani nga paka pisa. <sup>10</sup> Mimeksay ilan, laung nilan, "Penalan ta su Megbebaya', su pektemuyen ta muka' su pegingkud dini melengas gingkudan nu gadi' muka' penalan ta pa pagid ki Nati Karniru, pu' mikpuun dinilan dua' su kegawen dinita." <sup>11</sup> Naa, su kelaun sesugu'en nu Megbebaya' getaw langit, migalidung ilan pemegingdeg dia melengas gingkudan kia, muka' di peglidungan dadema nu nga meglegulang kaunutan sampay di paat buuk tetubu' biwat. Mimenlaub di gedapan nu gingkudan su nga getaw langit kia, pinginlu'udan nilan su Megbebaya'. <sup>12</sup> Kali' ilan

taluh, "Amen! Ki Megbebaya' kini, di nda'i gik-teben gembantang dadema tu'u penalan, megde-dengeg muka' pemilangen metelisebuten. Di nda'i tamanen gempia pekpeladpeladan, pegbe-saan sampay pemilangen ginuungan. Muka' megbaya' di nda'i tamanen! Amen!"

<sup>13</sup> Naa mendadi, sala tawan di nga megle-gulang kaunutan, sinaaken dinaan sa' ki nga getaw kia mimekseluk gemputi' mekelambung suub, ta' taway dun muka' sa' tanda' ilan genat.

<sup>14</sup> Kali'u peksembag, "Uu Sir, nda'u ma mesu-unay. Mabu' ya'ai mekesuun dun."

Kali' talu', "Ilan kini su mikebian di mek-endekekendek gupia kelegenay. Ikdakan na nilan su nga suub nilan dig dugu' nu Nati Karniru, adun mekeputi' na tanan. <sup>15</sup> Kaas mekaindeg ilan di gedapan nu melengas gingkudan nu Megbebaya', muka' meketamuy ilan diniin gebii gendaw dinig Balay Penedapan diniin. Penendingan ilan nu pegingkud di melengas gingkudan nu gadi', adun nda'i mpenggulaula nilan. <sup>16</sup> Kaas ndi' nailan mainsan puli' gutemen muka' kuaun, ndi' na nilan metigeli mesait pedes atawaka ta' alanduni gininisan mainit.

<sup>17</sup> Pu' megingat dinilan lelayun ki Nati Karniru pegindeg dia titenga' nu melengas gingkudan. Pengegaken ilan niin ditu tebud nu tubig mekeg-begay ketubu' nda'i tamanen, muka' pengua'en dinilan nu Megbebaya' sug launan mekpauba' di ginaa nilan."

*Sekaten nu Nati Karniru su Kepitu Pideketen dig Linulun Sinulat*

<sup>1</sup> Naa mendadi, su kepitu pideketen lunay nug linulun sinulat, bena' sikat nu Nati Karniru, mingamed dayun ditug langit taman ginenga' uras. <sup>2</sup> Bena' mitektaki ginenga' uras, minita'u su pitu tawan sesugu'en nu Megbebaya' getaw langit pegindeg ditu gedapan nu Megbebaya'. Miktukid ilan bugyung.

<sup>3</sup> Naa, duun paduni sala getaw langit mi-tua' pegindeg dia mesungu'an nu gentudan gilak. Piguidan nu getaw langit kiaig ya'ung bulawan, betangan pelinan. Bigay dayun diniin melaun pelinan, adun pedumanen ditu kenenabi nu nga piglegetawan nu Megbebaya', dayunen ilakay dia gentudan di mesungu'an nu melengas gingkudan kia. <sup>4</sup> Su gebel nu tinutung pelinan mipeduma di kenenabi nu nga piglegetawan nu Megbebaya', luminintuk diag ditaas, genat tug ya'ung piguidan nu getaw langit pegindeg dia gedapan nu Megbebaya'. <sup>5</sup> Pipenu' dayun nu getaw langit gapuy sug ya'ung bulawan bitangan pelinan pileket diag dibabaw gentudan gilak, muka' libu'anen dun sug lumbang. Migdelalak metikteg, duuni mesasak gupia, migbunsila'i gilat, miglinug pa padun.

*Su ngag Bugyung Pigiup nu nga Sesugu'en nu Megbebaya' Getaw Langit*

<sup>6</sup> Ma'antu, su pitu tawan sesugu'en nu Megbebaya' getaw langit bigayan bugyung, miuya' nailan megiup dun.



<sup>7</sup> Mendadi, sug bekna getaw langit, pitalu'en kig bugyungen. Dinupi'an dayun sug lumbang, dupi' batu muka' gapuy lamug dugu'. Mitutung dayun su ketelu ilasen dig dibabaw lumbang, muka' su ketelu ilasen di nga gayu sampay su nga kelaun mailaw sigbet.

<sup>8</sup> Naa, su kedua' getaw langiten, pitalu'en pelum kig bugyungen. Duun dayuni milabu' ditug dagat ma'niin palas gembagel dungus megliga'. Su ketelu ilasen ditug dagat, binaluy na dema dugu'. <sup>9</sup> Muka' pa pagid migela' matay su ketelu ilasen nu metetubu' muka' seda' diag dagat. Migela' pa padun meglaat su ketelu ilasen di ngag bangka' ditu.

<sup>10</sup> Naa su ketelu getaw langiten, pitalu'en pelum kig bugyungen. Lemen laak miktalu' sug bugyung, duuni gembagel bitun megliga' maa' nu tilaw, milabu', mitena' ditu ketelu ilasen di tinubigan sampay nga tebud. <sup>11</sup> Ngalan nug bitun kia, Gempait. Bena' mitena', binaluy gempait su ketelu ilasen di tubig, kaas melaun getaw minatay saba' nilan minum di tubig mibaluy gempait.

<sup>12</sup> Mendadi pitalu' na pelum nu getaw langit kig bugyungen, kia su kepaaten na. Misugat dayun su ketelu ilasen di gendaw, su ketelu ilasen dig bulan sampay su ketelu ilasen di ngag bitun. Kaas su ketelu ilasen di kedelag nilan, ndi' na mbaluy. Kaas dumilem dema su ketelu ilasen nu gendaw muka' nu gebii.

<sup>13</sup> Kali'u pungenleng puli', minita'ui maa' nu tipuli peglayug diag ditaas, lamugen memeksay, "Ay! Mekelelaatlelaat! Mekelelaatlelaat tu'u!

Sa' petelu'en nu telu tawan pa getaw langit sug bugyung nilan, mekelelaatlelaat gupia su kelaun pektetubu' dinig dibabaw lumbang!"

## 9

<sup>1</sup> Naa mendadi, pitalu' na pelum nu kelima getaw langiten kig bugyungen. Duun dayuni minita'u bitun, salabuuk, daan na milabu' diag lumbang. Kali'u pegbentayay, kig bitun kia, bigayan gunsu' pekpuka' dig luak bianan pangay ditug baya'. <sup>2</sup> Pinuka' dayun nug bitun kia sug baya'. Minipuglun gua' diag bisuangani gebel, ma'niin gebel nu gembagel gupia gapuy. Du-milem duni gendaw muka' gawanawan. <sup>3</sup> Duun dayuni nga gapan luminusad ditug lupa' genat dia gebel kia. Su nga gapan, bigayan ilan lala, mesama dig lala nu gulangulang. <sup>4</sup> Binandu dinilan su kepeglaat nilan sia tu sigbet, tu nga gayu sampay tu nga pimula, iin daw laaki pelegetan nilan su nga getaw ki nda'iduni tu'us nu Megbebaya' di gangasen. <sup>5</sup> Nda' dadema buang dinilan petain nilan su nga getaw pelegetan nilan, laak iin pasi'i bigay dinilan, pelesain nilan di mesait su nga getaw nda' tu'usay, taman lima bulan. Su kesait nu kepetuga' nilan di nga getaw, maa' daw nu kesait sa' segeden gulangulang. <sup>6</sup> Mendadi taman lima bulan kiin, enguten nu nga getaw matay sia, laak dagid ndi' matay. Penengaun nu nga getawig bian kepatay nilan sia, laak ma'niin ilan mpegliaw nu gumul nilan. <sup>7</sup> Mendadi, ki nga gapan kini, palas nilan ma'niin palas kebayu' minuya' na sumakay dun pangay lumumpak. Dia gulu nilan duuni maa'

nu tundek bulawan. Su mulu' nilan, ma'niin palas mulu' getaw. <sup>8</sup> Sug buuk nilan, ma'niin palas buuk libun, su ngisi nilan, ma'niin palas ngisi limaung. <sup>9</sup> Pinseluk nilan di gegdeb nilani penending dun maa' nu palas putaw, dayun sa' megedegud su nga gekpak nilan, ma'niin deguk nu melaun prada pegleguyuden nu nga kebayu' sa' menggebek pangay lumumpak. <sup>10</sup> Duuni gikug nilan muka' seged nilan maa' danu gulan-gulang. Su gikug nilan, mekpetuga' di nga getaw taman lima bulan. <sup>11</sup> Naa, duuni gadi' meguit di nga gapan kiin, iin su getaw langit megbaya' na dig baya'. Iini ngalanen sa' pikebitan nu getaw Judea, si Abbadon, sa' pikebitan nu getaw Grecia, si Apolyon (sa'itada ma'anenen su Menginapul).

<sup>12</sup> Mendadi sug bekna mekendekendek pelabu' sungu mayan dig lubang, mitubus na. Duun paig dua' ginis pelum sungu mpenggulaula.

<sup>13</sup> Naa, pitalu' na pelum nu ke'enem getaw langiten kig bugyungen. Midengegu dayuni tingeg ditu paat buuk sungut nu gentudan gilak kia bulawan dia gedapan nu Megbebaya'. <sup>14</sup> Ki tingeg kia, miktalu' dia ke'enem getaw langiten pegawid bugyung, "Naa, ki paat tawan getaw langit kia binalud ditu gembagel tubig Eufrates, beluyay mu ilan!" <sup>15</sup> Biluyanen tu'u ki paat tawan kia getaw langit. Gandang nailan pingandam, pemetain nilani ketelu ilasen di nga kilawan, di gempia uras, gendaw, bulan sampay taun tindu' nu Megbebaya'. <sup>16</sup> Duuni nga sakup nilan sundalu peksakay kebayu'. Tumu' pisuun dinaan sug laun nu sundalu peksakay kebayu'

kia, 200,000,000, sa'itada dua' laksa' pilu' di se-laksa'. <sup>17</sup> Iin dayun pinita' dinaan su nga kebayu' sampay su peksakay dun, pinseluk di gegdeb nilani penending dun, putaw gempula, ma'niin liga' gapuy, melunaw dadema gupia miglamug medalag. Su nga kebayu' pelum, gulu nilan, maa' da gulu limaung. Minggua' dig baba' nilani gapuy, gebel muka' asupre.\* <sup>18</sup> Dayun puun di telu pelabu' kiin, ki gapuy, gebel muka' asupre pekpenggua' diag baba' kebayu' kia, mitimalan mematay su ketelu ilasen di nga kilawan. <sup>19</sup> Pu' melala gupiaig baba' muka' gikug ni nga kebayu' kia. Su gikug nilan, ma'niin mamak, duun masi'i gulunen, iini memesait di nga getaw.

<sup>20</sup> Laak pia ma'antu, su ngag duma getaw nda' pematay di nga pelabu' kini, nda' nilan gusay teliuday su pektemuyen nilan, iin da gusay piktamuy nilan su pigbaal laak nilan. Minimal ilan sungkin mektamuy ditu menenulay muka' ledawan binaal bulawan, bulawan selapi', bedunsi, batu sampay gayu, su nga ndi' meken-gita', ndi' mekebatik, sampay ndi' mekepanaw. <sup>21</sup> Nda' da nilan padun pegbiksu'ay su keminasa nilan, su nga kenigdud nilan dig duma nilan, su kenlelingay nilan sampay su kegdaaw.

## 10

### *Su Getaw Langit Peguit Maika' Linulun Sinulat*

<sup>1</sup> Naa mendadi, minita'ui sala sesugu'en nu Megbebaya' getaw langit ginuungan gupia,

---

\* **9:17** 9:17 Duuni ginis mekaika' lupa' paingalan dun asupre, medalag tantu, medu' gupia maa' da gumanuk midu' na.

peglusad dinig lumbang genat ditug langit. Ki getaw langit kia, milipukutan iin nu gabun muka' piglidungan nug landungi gulunen. Su mulu'en, mekesulaw ma'niin nu mata gendaw, su mesekeg gupia gek suden, ma'niin dadema pasek megliga'. <sup>2</sup> Piguidaneni maika' linulun sinulat biklad di kemeten. Migbelak megindeg, sug lintu gek suden pi'indegen ditug dagat, sug bibangen pelum ditug lupa'an. <sup>3</sup> Miktawag dayun maa' nu genggel limaung, dayun simbag nu pitu buuk delalak, meketenug gupia. <sup>4</sup> Lemen laak mideksu'ig delalak, sulaten ku na sia. Laak dagid duuni midengegu talu' ditug langit, kali' talu', "Su tinalu' nu pitu buuk delalak, pegbuni mu, ndi' mu sulatay!"

<sup>5</sup> Naa, minita'u dayun su getaw langit, ki pegindeg diag dagat muka' lupa', tinggalenig baingkenen dapit lintu ditug langit, <sup>6</sup> pu' sum- inapa, peksembayanen su Megbebaya' su nda'i gumulen, su Mikleb tug langit, Miwat tug lupa', Minunag tug dagat muka' Minaglis tu tubig, sam- pay Mitang tug lumaun bitang dun. Kali' sapa su getaw langit, laungen, "Nda'idun na dema tu'ui mekelangan dun! <sup>7</sup> Pu' sa' petelu'en na nu kepitu getaw langiten kig bugyungen, dayun na tu'u penuuday nu Megbebaya' ki pigbuni pigdelendemen di pisuunen dengantu tu nga sesugu'enen pimuunanen."

<sup>8</sup> Naa mendadi, midengegu na puli' su tingeg kiin ditug langit. Kali' talu' dinaan, "Diaan ka na, alap mui mibeklad sinulat kia, ki peguidan nu getaw langit pegindeg diag dagat muka' lupa'."

<sup>9</sup> Kaas pisempelan ku dayun su getaw langit, adun penengiin ku diniin su maika' linulun sinulat. Kali' talu' dinaan su getaw langit, “Alap mu ini, dayun aan mu. Naa sa' dia pa baba' mu, memis maa' teneb, laak sa' medul mu na, tulisan ka dun.”

<sup>10</sup> Naa sa' ma'antu, inalapu tu'u su maika' linulun sinulat ditu kemeten dayun inaan ku. Memis tu'u sinegay diin pa baba'u, laung mu dun teneb. Laak bena' midulu na, tinulisanu tu'u.

<sup>11</sup> Kali' pektalu' dinaan, “Subay pegwali mu puli' su talu' nu Megbebaya' mekatag di kelaun bansa muka' nasud, su kelaun ginis pikebitan metalu' nu getaw, sampay su kelaun gadi'.”

## 11

### *Kig Dua' Tawan Megukit Talu' nu Megbebaya'*

<sup>1</sup> Mendadi bigayanu pektepeng ma'niin sekud, dunut duuni miktalu' dinaan, laungen, “Pegbu-ata, kig Balay Penedapan tu Megbebaya', tepeng mu, sampay su gentudan gilak, dayun bilang mu dadema su kelaun getaw memektamuy dia.

<sup>2</sup> Laak ndi' mu tepengay sug lenu'an diag liu, pu' kia, bigay na ditu nga getaw kana' getaw Judea. Ilan kiin, peglaatan nilan su syudad pinaas nu Megbebaya' taman paat pulu' bu' dua' bulan.

<sup>3</sup> Pepegwaliu dademaig dua' tawan pekseluk suub saku, dayun pegukiten nilan su talu' nu Megbebaya' gikteb sengibu bu' dua' gatus bu' enem pulu' endaw.”

<sup>4</sup> Naa kig dua' tawan megukit kia, ilan sug dua' puun gayu olibo, ilan dadema sug dua' buuk betangan sulu' kia bitang ditu mesungu'an

nu Kaunutan di tibuuk lumbang. <sup>5</sup> Sa' duuni mekpeleget dinilan, menggua' dig baba' nilani gapuy mekesapul dun su nga kumontra dinilan. Ma'antu, adini mauya'anen mekpeleget dinilan dua', mekangay ditu kepatay. <sup>6</sup> Muka' pagid duuni pegbaya' nilan megbelibad dig dupi' saanan nilan megwali tu talu' nu Megbebaya'. Mpegbia'an nilan dadema su nga tebud mbaluy dugu', muka' duun pa pagidi pegbaya' nilan dig benwa, pia ta' pelebu'ay dun, pia sanu deksu'i mauya'an nilan pebianen nilan dun.

<sup>7</sup> Naa, kig dua' tawan megwali, sa' metubus nilan peglegintuuday, bunu'en ilan nu mek-  
endekendek menamad gua' dig luak bianan pangay tug baya'. Daagen ilan nu menamad, dayunen ilan petayay. <sup>8</sup> Sug bangkay nilan, mbilin laak ditug dalan nu gembagel syudad tanda' linansang su Kaunutan nilan di kurus.\* Sodoma atawaka Ehiptoi samingay ngalan nu gembagel syudad kiin. <sup>9</sup> Naa, duuni nga getaw dig launan bansa, di kelaun pikebitan, sakup ilan di tiba'an benwa muka' lumaun nasud, pegeklungan nilan sug bangkay nug dua' tawan kia taman telu endaw bu' selapus. Muka' ndi' nilan buangen lebengay sug bangkay nug dua' tawan megwali kia. <sup>10</sup> Penleliagen dayun su kelaun getaw dinig dibabaw lumbang ditu kepatay nilan dua'. Meglekebibu su nga getaw muka' megbebegayay ilan, pu' kig dua' tawan megwali, mekpuun dinilan su nga kelegenay nu nga kilawan. <sup>11</sup> Laak dagid bena' minayan nai

---

\* **11:8** 11:8 Sa'itada ki Jerusalem.

telu endaw bu' selapus, kig dua' tawan megwali, pitubu' ilan puli' nu Megbebaya'. Migbuat nailan tu'u, kaas mipati' gupia mendek su nga kelaun getaw mikaita' dinilan. <sup>12</sup> Duun dayuni midengeg nug dua' tawan megwali migbeksay ditu gekbus langit, kali' talu', "Lentu namu dini!" Lumintu nilan dua' pangay tu'u ditug langit, pigalidungan ilan nu gabun saanan pegbantay dun su nga kumuntra dinilan. <sup>13</sup> Iin dayuni miglinug metikteg. Naa su kesepulu' ilasen di gembagel syudad, migeba', mimatay duni pitu ngibu tawan getaw. Su nga getaw nda' patay, mimegendek, pinalan nilan gupia su Megbebaya' ditu gekbus langit.

<sup>14</sup> Naa, mipapas na su kedua' pelabu'en. Laak, bentayay pa daan niu, sungu mateng ki ketelunen.

### *Su Kepitu na Bugyungen*

<sup>15</sup> Naa mendadi, su kepitu getaw langiten mibegayan bugyung, pitalu'en dayun kig bugyungen. Duun dayuni migdengan memeksay ditug langit, laung nilan, "Megbaya' na tu'u tu tiba'an kilawan su Kaunutan ta Megbebaya' muka' su Tindu'en Meglekaunutan, muka' iin, meglekaunutan di nda'i gikteben!" <sup>16</sup> Dayun sug dua' pulu' bu' paat tawan meglegulang kaunutan memegingkud dia nga gingkudan nu gadi' dia mesungu'an nu Megbebaya', mimenlaub ilan mengamuyu' tu Megbebaya', <sup>17</sup> kali' ilan pektalu',

"Uu Kaunutan Megbebaya' ki Tampusan Ginuungan, su tetubu' nandaw bu' dengantu!



Mekpaladpalad ami dini'a, pu' diin na gengke-  
man mu su gembagel pegbaya' mu,  
muka' mikpuun ka na tu'u meglekaunutan.

<sup>18</sup> Minlimuuk su ngag bansa getaw kana'  
piglegetawan mu,  
pu' minateng na su masa nu kepelabu' mu  
dinilan,  
ki masa nu kengukum mu tu nga mimatay,  
muka' gempia mu sugdaan di melengas su nga  
getaw sesugu'en mu migwali tu talu' mu  
sampay su nga piglegetawan mu, sug lumaun  
megbasa dini'a,  
sa' su ngag datu' sa' su gempusuk.

Minateng na su masa gempia mu sepulen su nga  
menginapul di tibuukan lumbang!"

<sup>19</sup> Mendadi sug Balay Penedapan ditug langit,  
mipuka', dayun midayag diag dialemen su kaban  
gindan tug bekna sabut nu Megbebaya'. Dayun  
migbunsila'i gilat, mingeneg, migdelalak metik-  
teg, miglinug sampay migdupi' batu, gempales  
dupi'.

## 12

### *Sug Libun muka' su Mekendekendek Buaya*

<sup>1</sup> Naa mendadi, mitua' ditug langit ki meke-  
salebu' gupia tu'us. Duunig libun, su gendawi  
suuben, sug bulan, gindeganen, muka' mipenun-  
dek diniini sepulu' bu' dua' buuk bitun. <sup>2</sup> Kig  
libun kini, sungu megbata'. Saba' kesait nu  
kegbatik tianen, mengagedi tanan mengaduy.

<sup>3</sup> Naa, duun pa pelumi sala mekesalebu' tu'us midayag ditug langit. Gembagel gupia metetubu', gempula, ma'niin palas mamak atawaka buaya, pitu buuki gulunen, sepulu'i sungagen. Miktukid dadema tundeki nga gulunen. <sup>4</sup> Mendadi impun nu ma'niin buaya di gikugen su ketelu ilasen di ngag bitun diag langit, piniglaken dayun dinig lumbang. Pegindeg iin dayun dia mesungu'an nig libun kini, adun depa'enen su gembata' sa' megigetaw na. <sup>5</sup> Dayun megaanay kig libun kia. Kali' pegigetaw su gembata', bata'laki, iin su meglekaunutan di nga kelaun nasud muka' bansa lema' denlag. Metegasi keguiten dinilan, pu' peguit dinilan su sekunden putaw. Laak dagid duuni suminakmit tu gembata', dayun iwit ditu Megbebaya', ditu melengas gingkudan gadi'. <sup>6</sup> Mikeglaguy dayun sug libun ditug limawa' daan na pingandam nu Megbebaya' pegbebenwananen. Pi'ingat dayun nu Megbebaya' dia sug libun, taman sengibu bu' dua' gatus bu' enem pulu' endaw.

<sup>7</sup> Mendadi bena' mitektak na su sengibu bu' dua' gatus bu' enem pulu' endaw, iin dayuni pikpuunan nu gubat ditug langit. Si Miguel, sala tawan di nga sesugu'en nu Megbebaya' getaw langit, muka' su nga sakupen sama sesugu'enen, mingatu ilan ditu ma'niin buaya kia. Ki ma'niin buaya kia muka' su nga sakupen sama sesugu'enen, mingatu dailan dema megbunu'. <sup>8</sup> Laak dagid, dinaag gupia su ma'niin buaya muka' su nga sesugu'enen kia. Pingutidan ilan dayun diag langit, subay ndi' nailan puli' megbenwa dia. <sup>9</sup> Mendadi ki gembagel metetubu'

ma'niin palas buaya, linabu' na tu'u dini silung. Iinen su mamak dengantu, ngalanen su Palin muka' si Satanas, su miglimbung di tiba'an kilawan. Sampay su nga sama sesugu'enen getaw langit, linabu' dailan dema gela' dinig lumbang.

<sup>10</sup> Mendadi, bena' milabu' ilan, duun dayuni midengegu beksay ditug langit, laungen, “Ki keglegawen nu Megbebaya' di nga kilawan, minuud na tu'u nandaw! Su pegbaya' nu Megbebaya', biwasanen na gupia, pu' iini tantu Gadi'. Ki Tindu' nu Megbebaya' Meglekaunutan pa pagid, biwasan na dema sug daniin pegbaya'! Pu' ki migindeg ditu gedapan nu Megbebaya' adun dengatenen gebii gendaw su nga mimated dinita, iin, piawa' na dinig langit. <sup>11</sup> Su nga mimated dinita, mikedag nailan ditug dumangat dinilan kia, pibian dig dugu' nu Nati Karniru, puun dadema tu talu' nu Megbebaya' piglegintuud nilan. Pu' nda' dig delendeman nilan su gumul nilan, kaas laga' na tu'u nu kesakup nilan su gumul nilan. <sup>12</sup> Kaas yamu nga tiba'an megbenwa dinig langit, gempia penleliagen amu! Laak dagid, yamu nga megbenwa diag lupa' muka' diag dagat, mekelelaatlelaat amu gupia! Pu' su Palin, luminusad na diniu. Iin, mipati' gupia mangit, pu' saba' misuunanen sungu na mengikteb su sikawanen menggulaula melaat.”

<sup>13</sup> Naa, ki ma'niin palas buaya, kali'en mesuunay pu' linabu' dinig lumbang, pingeteden dayun sug libun kia migbata' bata'laki. <sup>14</sup> Laak dagid sug libun, bigayan dua' buuk gekpak gembagel tipuli, adun mekelayug meglaguy ditug limawa',

ditu tanda' paingaten iin taman telu taun bu' ginenga', adun ndi' medepilan nu ma'niin buaya. <sup>15</sup> Dagid, ki maa' nug buaya, sinumpitanen dayun sug libun tubig, laung mu dun ma'niin nu guluan baa', adun sia manud ditu selegan sug libun. <sup>16</sup> Laak dagid, ibangan pasi' nug lupa' sug libun, pu' miganga sug lupa', dayunen igupay su tubig sinumpit dun sia nug buaya. <sup>17</sup> Iin, mitutung dayun gangiten ditug libun, kaas pigbunu'en su kelaun lain bata' nug libun, sa'itada su ngag lumaun mikpetuud ditu pinalinta nu Megbebaya', ki dumunut tu metuud ginukit ni Isus. <sup>18</sup> Dayun ki ma'niin palas buaya kia, megingdeg dia geksid dagat.

## 13

### *Sug Dua' buuk Mekendekendek Menamad Begayan Pegbaya'*

<sup>1</sup> Mendadi bena' nda' maiben, duuni minita'u ki mekendekendek menamad guminawen diag dagat. Ki menamad kia, sepulu' buuki sungagen, pitu buuki gulunen, miktukid tundeke nga sungagen. Su nga gulunen, miktukid dadema sulatay ngalan meksudi' ditu Megbebaya'. <sup>2</sup> Iini palas nu menamad minita'u, ma'niin gembagel malig kuting. Su geksudun, maa' danu gembagel gitu' telunan. Sug baba'en, ma'niin baba' limaung. Mendadi, su metetubu' ma'niin palas buaya, bigayen dayun ditu menamad su ginuungen muka' su keglekaunutanen sampay su metaas pegbaya'en. <sup>3</sup> Naa, ki menamad guminawen ditug dagat, salabuuk di nga gulunen, mipati'

mengelay, palas gangelen mekepatay. Laak dagid su gangelen, mikpali' na. Misebu'an dun dayun sug launan getaw, bena' suminakup ilan diniin, <sup>4</sup> muka' piktamuy nilan dadema su metetubu' ma'niin palas buaya, pu' saba' bigayen tu menamad kia su metaas pegbaya'en. Muka' piktamuy pa padun nu nga getaw su menamad. Kali' ilan talu', "Ki menamad kini, nda'idunig lepengen. Nda'iduni mekengatu megbunu' dun!"

<sup>5</sup> Naa, ki mekendekendek menamad kiin, mibuang diniin menakabul sampay meksudi' gu-pia tu Megbebaya', muka' bigayan pegbaya' gik-teb laak paat pulu' bu' dua' bulan. <sup>6</sup> Piksudi'anen su Megbebaya', su ngalan nu Megbebaya', muka' su pegbenwananen, sampay su ngag launan megbenwa ditug langit. <sup>7</sup> Biwang dadema di menamad lumpakanen su nga piglegetawan nu Megbebaya' dinig lubang, muka' daagenen ilan, sampay bigayan dadema pegbaya'en meglekaunutan di kelaun bansa, di tiba'an benwa, dig launan getaw pia ta' pikebitanay dun, sampay dig lumaun nasud. <sup>8</sup> Ma'antu mektamuy tu'u diniin sug launan kilawan megbenwa dinig dibabaw lubang, sa'itada su nga getaw nda' mesulati ngalan nilan tug linulun sinulat nu pinatay Nati Karniru. Pu' su nda' pa mbaali gekleb langit bu' lupa', linista na dig linulun sinulat kiin su ngalan nu nga getaw mpeduma di ketubu' nda'i tamanen.

<sup>9</sup> Kaas adin sug duuni telinganen, mekineeg dema tu'u! <sup>10</sup> Adini getaw singu'anen daapen, iini daapen tu'u. Adin pelumi getaw singu'anen

kepetayanen sundang, sundangi pekpatay dun tu'u. Kaas ita nga piglegetawan nu Megbebaya', subay menamal ita mektigel di kelegenay ta, muka' sumalig ita gusay diniin.

<sup>11</sup> Mendadi duun pa pagidi minita'u sala mek-  
endekendek menamad gumiwa' dig lupa'. Ki  
menamad kia gumiwa' dig lupa', dua' buuki  
sungagen maa' sungag nati karniru, laak su  
taluen, maa' danug buaya. <sup>12</sup> Iin, pipegbia'an  
nug bekna mekendekendek menamad, adun  
sumugut dun. Tigelen su tibuuk lumbang mek-  
tamuy ditug bekna mekendekendek menamad,  
su mipati' gangel laak mikpali' na. <sup>13</sup> Naa,  
ki kedua' mekendekendek menamaden, pinggu-  
laulaneni nga mekesalebu' ginuung, pilebu'anen  
gapuy kig lumbang kini genat ditug langit di  
pegita'en nug launan getaw. <sup>14</sup> Piglimbunganen  
su kelaun getaw dinig dibabaw lumbang pibian  
di mekesalebu' tu'us biwang diniin penggulaula-  
nen di gedapan nug bekna mekendekendek  
menamad. Sinugu'en dayun su kelaun getaw  
dinig lumbang megbaal ilan ledawan, palas nug  
bekna mekendekendek menamad, adun pegbasa  
diniin, su miangel sundang laak nda' mpatay  
dun. <sup>15</sup> Biwang dayun tu kedua' mekendekendek  
menamaden begayanen ginaa sug ledawan nug  
bekna mekendekendek menamad, adun mekek-  
taluh' sug ledawan muka' mekepatay tu nga ndi'  
mektamuy diniin. <sup>16</sup> Tigelen dayun sug launan  
getaw, sug duuni gelalen sa' su nda'idun, sug  
datu' sa' su gempusuk, su gulipen sa' su kana'  
gulipen, betangan tu'us sug lintu kemet nilan  
muka' su gangas nilan. <sup>17</sup> Nda'iduni mekesaluy

muka' mekeksesaluy, bisan ta' taway dun, subay su laak mibaalan tu'us. Ki tu'us kia, su ngalan nug bekna mekendekendek menamad, atawaka sug lumiru ganti' tu ngalanen.

<sup>18</sup> Naa subay melisebuten amu. Adin su metaasi tinawanen, iini mekaulug dig lumiru kini nu menamad, pu' kig lumiru, guminanti' di ngalan nu getaw. Ki genem gatus bu' enem pulu' bu' enem (666), iin sug lumiru nug bekna mekendekendek menamad.

## 14

### *Su Nati Karniru muka' su nga Sakupen*

<sup>1</sup> Mendadi kali'u pegenleng, minita'u su Nati Karniru pegindeg ditug bentud Sion. Duun dademai megatus bu' paat pulu' bu' paat ngibu tawan getawig duma nu Nati Karniru. Ki nga melaun getaw kini, misulat di gangas nilan su ngalan nu Nati Karniru muka' su ngalan nu Gama'en. <sup>2</sup> Duun pa pagidi midengegu talu' ditug langit ma'niin deguk nu tubig dia metaas baga, ma'niin dadema metikteg delalak. Su tingeg midengegu, mekauyuk arpa pegayep nu nga getaw.\* <sup>3</sup> Naa ki nga megatus bu' paat pulu' bu' paat ngibu tawan getaw kini, memegindeg ilan dia mesungu'an nu melengas gingkudan gadi', di gedapan dadema nu paat buuk tetubu' biwat sampay nu nga meglegulang kaunutan. Pemegbebaten nilanig begu bebat. Nda'ig lain getaw mekesuun dun, ilan laak su nga milekat

---

\* **14:2** 14:2 Sug arpa, ginis gayepan duuni kurdasen sugiten nu megayep dun.

dini tibuuk lumbang. <sup>4</sup> Ilan dademai nga getaw, sa' beni' dagid melinggas ilan, pu' nda' ilan pegdusa. Genat pa di kaika'ay nilan nda'i kelemu'ay nilan. Megdedunut ilan gusay ditu Nati Karniru, pia tanda' iin pangay. Likat ilan nu Karniru di kelaunan kilawan, kaas ilani mibaal bekna begay ditu Megbebaya' muka' ditu Nati Karniru. <sup>5</sup> Pu' nda'iduni medengeg talu' nilan balus muka' kana' ilan medangat.

*Su Telu Tawan Sesugu'en nu Megbebaya' Getaw Langit*

<sup>6</sup> Naa mendadi, minita'u pa paduni sala sesugu'en nu Megbebaya' getaw langit peglayug ditu gawanawan. Ki getaw langit kini, peguitenen su Gempia Petenday ndi' mpapas, adun mpelaktag di nga getaw dinig dibabaw lumbang, di tiba'an bansa, dig lumaun benwa, pia ta' pikebitanay dun, sampay ditu nga getaw di kelaun nasud. <sup>7</sup> Miktegas dayun mektalu'i getaw langit, laungen, "Ki Megbebaya', pegbesaay niu iin dunut mendek amu dun, muka' penalan niu! Pu' mitektak na tu'u su sesa', ukumenen na tu'u su tiba'an kilawan. Pektamuy niu gusay su Mikleb dig langit, su Miwat dig lupa', su Minunag dig dagat sampay di nga kelaun tebud!"

<sup>8</sup> Duun dayuni kedua' sesugu'en nu Megbebaya' getaw langit suminukli ditug bekna getaw langit. Kali' pektalu' su kedua' getaw langit, "Migeba'! Ki migdedengeg gupia syudad kiin, Babilonia, migeba' na tu'u! Iini pilebu'an dun, pu' pi'inumen na di tiba'an getaw su gembisa



penginumenen, ki penginumen, iin su gayaken gupia tu kegdusa.”

<sup>9</sup> Mendadi duun na pelumi ketelu getaw langiten suminukli ditug dua' tawan kia miuna. Iin, miktegas dayun mektalu', “Adin su getaw mektamuy ditug bekna mekendekendek menamad muka' ditug ledawanen, sampay begayen mesulatani gangasen atawaka kemeten tu'us nu menamad kia, <sup>10</sup> iin, mainumen pa su penginumen nu Megbebaya'. Nda' belekwitay su penginumenen pia maika', aalen ditu tasa nu gangiten, sa'itada su kekpelabu' nu Megbebaya' dig lumaun mikesala'! Su kelaun kilawan mektamuy ditu mekendekendek menamad, pelegetan ilan di gapuy nda'i kepalengen muka' di pegliga' asupre.† Kiin, mbianan nilan di pegita'en nu nga pinaas sesugu'en nu Megbebaya' getaw langit, sampay di gedapan nu Nati Karniru. <sup>11</sup> Su gebel nu gapuy kia mekpeleget dinilan, peglintuk di nda'i gikteben. Ki tiba'an kilawan mektamuy tu menamad muka' ditug ledawanen, bisan ta' taway dun misulatan ngalan nu menamadi gangasen, sa' su kemeten, gebii gendaw subay mektigel di keleget nda'i kesikpa'en.” <sup>12</sup> Kaas, ita pasi' nga piglegetawan nu Megbebaya', su nga mekpetuud di pinalintanen muka' sumalig gusay ditu Kaunutan ta si Isus, subay menamal ita mektigel di kelegenay ta.

<sup>13</sup> Naa mendadi, duun dayuni midengegu tingeg ditug langit, kali' talu', “Kini pelum

---

† **14:10** 14:10 Duuni ginis mekaika' lupa' paingalan dun asupre, medalag tantu, medu' gupia maa' nu gumanuk midu' na.

sulat mu. Genat nandaw leliagen gusay su nga mematay puun tu keksalabuuk nilan ditu Kaunutan!”

Kali' sumpat sug Balakat nu Megbebaya', “Metuud lai daan, mekelali nailan tu'u dig lasay nilan, pu' sa' muli' nailan dini, mui na dema nilan su sengk'u' nug lesayan nilan.”

### *Su Sengk'u' dinig Lumbang*

<sup>14</sup> Mendadi tubus nitu, kali'u pegbantay, minita'ui gempti' gabun, duuni pegingkud dia gabun ma'niin nu kilawan. Ki pegingkud dia, duuni tunden bulawan dia gulunen. Pegawid mauteng garab. <sup>15</sup> Dayun duuni sala getaw langit gumiwa' diag Balay Penedapan tu Megbebaya', muka' minekeg mektalu' ditu pegingkud dia gabun, “Peglabay mu su garab mu, peglegania na, pu' minateng na tu'u kig basa meglegani. Mainug na pakayaw su geniin dinig lumbang!” <sup>16</sup> Piglabay dayun tu'u nu pegingkud dia gabun su garaben. Kaas sug lumbang, mitebas na.

<sup>17</sup> Naa, duun pa pagidi minita'u sala getaw langit gumiwa' ditug Balay Penedapan tu Megbebaya' ditu gekbus langit. Iin, peguit dadema mauteng garab.

<sup>18</sup> Mendadi, duun pelumi getaw langit gumiwa' ditu gentudan gilak. Iini megbaya' ditu gapuy. Tiwaganen su getaw langit kia, su peguit dadema garab, kali' talu', “Peglabay mu su garab mu, adun lugdas mu na su kelaun bunga gubas dia pigimulanan dun dig lumbang, pu' migela' na mainug su ngag bunganen!” <sup>19</sup> Ma'antu piglabay tu'u nu getaw langit su garaben muka'

linugdassen dayun su kelaun bunga nu gubas kia. Bena' mitubus, dayunen pengempunay, linabu'en dayun ditug luak tanda' peesen nu Megbebaya' su gubas adun baalenen penginumen. Ki kekpeesen kiin, iin su gangit nu Megbebaya'. <sup>20</sup> Laak pinees su nga gubas diag liu syudad. Bena' pinees, migbaa' dayuni pineesan dun. Kig baa', dugu', telu gatus kilumitruig yeba'an nug dugu', sedepai kedalemen.

## 15

### *Pengendamen su Katapusan Pelabu'*

<sup>1</sup> Naa mendadi, duun na pelumi sala mekesalebu' gupia tu'us minita'u ditug langit. Duuni pitu tawan sesugu'en nu Megbebaya' getaw langit, peguiten nilani pitu ginis pelabu' mayan dinig benwa. Iin na su katapusan pelabu' nu Megbebaya', megela' na tu'u mekpalas dun su gangiten.

<sup>2</sup> Muka' pagid, duun dademai minita'u dagat, ma'niin palas pagalungan milemugan gapuy. Minita'u pa pagid su nga getaw mikegdaag ditug bekna mekendekendek menamad, sug duunig ledawanen muka' sug lumiru ledawan nu ngalannen. Ki nga getaw kini, memegindeg ilan ditu geksid nug dagat kia ma'niin palas pagalungan, peguidan nilani ngag arpa bigay dinilan nu Megbebaya'. <sup>3</sup> Pegbebaten nilan sug bebat ni Moises, su sesugu'en nu Megbebaya' dengantu, iin dademaig bebat nu Nati Karniru. Kali' ilan pegbebat,

“Uu Kaunutan Megbebaya', Tampusan Ginuungan,  
Su gulaula mu, migleep gupiaig dengegan nu  
kelengasen.

Kig baalen mu, mekesalebu' tanan!

Nda'iduni nasud, sa' kana' ya'ai meglekaunutan  
dun.

Kig betad mu, meglepeng tandeng muka' metuud  
gupia.

<sup>4</sup> Nda'idun bai getaw ndi' megbasa dini'a, uu  
Kaunutan?

Adin ba saani mpauk mangken pu' melengasi  
pegbaya' mu?

Pu' nda'idunig lain mikpaas ditu melaat, ditu  
sala', ya'a laak.

Mekpesempel dini'a su nga ginsekupan nu  
tiba'an nasud,  
adun mengamuyu' ilan dini'a.

Pu' medayag nu kelaun getaw su mekesuun  
gulaula mu.”

<sup>5</sup> Mendadi tubus nitu, minita'u sug Balay  
Pingedapan tu Megbebaya' ditu gekbus langit  
kampu' nug lepintaw dia pegbenwanan nu Meg-  
bebaya', mipuka'. <sup>6</sup> Gumiwa' diai pitu tawan  
sesugu'en nu Megbebaya' getaw langit, peguiten  
nilan su pitu ginis katapusan pelabu' pebianen  
dinig dibabaw benwa. Mengelinggat tanani suub  
nu nga getaw langit kia saba' keputi'en, saba'  
dadema kelenu'en. Duun dadema di gegdeb  
nilani misulagdat dun bulawan. <sup>7</sup> Mendadi sal-  
abuuk di nga paat buuk tetubu' biwat kia, duuni  
pitu buuk ya'ung bigayen tu nga pitu tawan  
getaw langit kia. Ki pitu buuk ya'ung kini, gaalan

bulawan, mipenu' nu gangit nu Megbebaya', su nda'i gumulen. <sup>8</sup> Naa sug Balay Pangedapan tu Megbebaya', mileep gebel puun tu tiag nu Megbebaya' muka' ginuungen. Kaas nda'iduni mekeseled dig balay kia, subay mpapas pai pitu ginis pelabu' kia iwit nu pitu tawan sesugu'en nu Megbebaya' getaw langit.

## 16

### *Su Gaalan Mipenu' nu Gangit nu Megbebaya'*

<sup>1</sup> Mendadi, duuni metikteg gupia talu' diag Balay Pangedapan tu Megbebaya'. Tilu'aneni pitu tawan sesugu'en kia nu Megbebaya' getaw langit, laungen, "Panaw namu. Bunag na niu ditug lumbang ki pitu buuk gaalan niu bitangan gangit nu Megbebaya'!"

<sup>2</sup> Naa sug bekna getaw langit kia, mipanaw dayun tu'u, binunagen tu'u su peguidanen gaalan dinig lumbang. Lemen laak mibunag, duun dayuni mesait gupia penleduun mitua' dia panit nu nga getaw misulatan ngalan nu mekendekendek menamad, su kelaun miktamuy ditug ledawanan.

<sup>3</sup> Mendadi bena' mitubus, su kedua' getaw langiten, binunagen na pelum su gaalanen, ditunen pelum binunag dagat. Sug dagat, binaluy dayun maa' nug dugu' bangkay. Dayun mimatay su kelaun metetubu' muka' seda' diag dagat.

<sup>4</sup> Tubus nitu, su ketelu getaw langiten, binunagen na pelum su gaalanen, ditunen pelum binunag ngag lawas tubig muka' ditu nga tebud. Binaluy dadema dugu' su nga tubig sampay

su nga kelaun tebud. <sup>5</sup> Midengegu dayun su tingeg nu getaw langit megbaya' tu tubig. Kali' talu', "Uu Diwata mikpaas ditu melaat, ditu sala', su tetubu' nandaw muka' su tetubu' dengantu, meglepeng gupia ki nga kengkum mu kini di nga getaw. <sup>6</sup> Su nga getaw kia, kagina pitigis ma nilan sug dugu' nu piglegetawan mu kampu' nu nga megwali tu talu' mu, naa pi'inum mu dadema dinilan dugu'. Iin maig bantang sugda dinilan." <sup>7</sup> Midengegu dademai miktalu' dia gentudan gilak, laungen, "Uu Kaunutan Megbebaya' Tampusan Ginuungan, su kengkum mu, meglepeng tantu muka' metuud gupia!"

<sup>8</sup> Mendadi su kepaat getaw langiten, binunagen na pelum su gaalanen, ditunen binunag mata gendaw, kaas biwang dun pepesu'en su nga getaw saba' nu kainiten. <sup>9</sup> Dayun mipati' tu'u mpasu' su nga getaw dinig dibabaw lumbang, saba' kainit nu gendaw. Tinampalaksan nilan dayun su Megbebaya', su migbaya' di nga kelaun pelabu'. Laak dagid bisan ma'antu, nda' ilan gusay pegbiksu' di sala' nilan muka' nda' nilan gusay pegdedengegay su Megbebaya'.

<sup>10</sup> Mendadi, su kelima getaw langiten, binunagen na pelum su gaalanen. Binunaganen dun su gingkudan nu mekendekendek menamad. Su keglekaunutan nu menamad kia, dumilem dayun. Pingebut tanan nu nga getaw sug dila' nilan saba' kektigel nilan di mesait. <sup>11</sup> Tinampalaksan nilan su Megbebaya' ditug langit, saba' nu nga mesait nilan muka' nu nga melaat gupia leduun nilan. Laak dagid bisan

ma'antu, nda' nilan gusay teliuday su melaat gulaula nilan.

<sup>12</sup> Mendadi, su ke'ennem getaw langiten, binunagen na pelum su gaalanen. Ditunen binunag lawas nu gembagel tubig piningalan dun Eufrates. Mitian dayun su tubig, pu' adun duunig dalan nga gadi' mpanaw genat ditu dapit silangan. <sup>13</sup> Minita'u dayun ki ma'niin palas buaya kia, muka' sug bekna mekendekendek menamad, sampay su sala tawan tautau pimuanan daw nu Megbebaya'. Telu ilan.\* Duun dademai gumiwa' dig baba' nilan, telu buuk mekelemu'lemu' menenulay. Ki menenulay kia, palas nilan ma'niin nu gekbak. <sup>14</sup> Ginuungan ilan gupia menggulaula mekesalebu'. Tukiden nilan laaway sug launan gadi' dini tibuuk lumbang, pungunen nilan, pu' adun menlumpak ilan sa' mateng na ki mekesalebu' gendaw tindu' nu Megbebaya', su Tampusan Ginuungan.

<sup>15</sup> Naa, midengegu miktalu' su Kaunutan ta, "Pektalentenay niu gupia! Mpuli' dau diin maa' nu ketua' nu megdaaw, pu' metekawan. Su pegenduk muka' sug lelayun pegandam di penepetenen adun sa' tekaw mekepanaw, kana' da peglebas, ndi' da mpiidan di gedapan nu melaun getaw, ilan, leliagen ilan."

<sup>16</sup> Naa, minita'u dayun pinungun tu'u nu menenulay su nga gadi', ditu nilan pungunay salabuuk benwa, piningalan dun nu getaw Judea Armagedon.

---

\* **16:13** 16:13 Ki tautau pimuanan nu Megbebaya' kiin, iin su kedua' menamaden kia, su gumiwa' dig lupa'.

17 Mendadi, su kepitu getaw langiten, binunagen na pelum su gaalanen. Ditunen binunag gawanawan. Duun dayuni minikteg mektalu' ditug Balay Pengedapan tu Megbebaya', kali' pektalu', "Naa mingikteb na!" 18 Migilat dayun lamug mikpenlugung, mesasak gupia, sampay metiktegig linug. Genat pa dengantu nda' pa siben bianay ki ma'nia ketiktegen. 19 Sa' ma'antu, su migdedengeg gupia syudad kia Babilonia, mipegilas telu ilasan, muka' migeba' tanan su ngag lunsud di nga kelaun nasud. Pu' su Megbebaya', midelendemen su syudad, kaas pi'inumen dun su penguinumen bitang tu tasanen, sa'itada su gembagel gangiten. 20 Muka' su kelaun pinulu'an diag dagat muka' su ngag binentudan, migela' dadema malep. 21 Dinupi'an dayun dupi' batu su nga getaw dinig dibabaw lumbang. Kada salabuuk dig dupi' batu kia, naa lima pulu' kiluig begaten. Tinampalakaan dayun nu nga getaw su Megbebaya', saba' melaat pati' pelabu' sug dupi' batu kia.

## 17

### *Sug Libun Meglaat Pekesuunan*

1 Naa mendadi, sala tawan di nga pitu tawan sesugu'en nu Megbebaya' getaw langit pegawid pitu gaalan, mikpesempel dinaan. Kali' pektalu', "Dunuta dinaan, pu' ki migdedengeg libun kiin tebia' meglaat pekesuunan, paita'u dini'a sa' enduta'en ku dun pelebu'ay. Guluganen su gembagel syudad dia mibetang tanda' nu timualag. 2 Su nga gadi' dinig lumbang kini,



tebia' miksumbang tu migdedengeg laa't libun kia. Ma'niin mibulek di penguinumen su kelaun getaw saba' nu kainum nilan dig dusanen."

<sup>3</sup> Naa mendadi, pingepu'anu nug Balakat nu Megbebaya' muka' iwitu nu getaw langit di-tug limawa'. Bena' ditu nau, duuni minita'u libun peksakay di gempula menamad. Su sikayanen menamad, mekendekendek, mileep sulatay nga ngalan meksudi' tu Megbebaya', pitu buuki gulunen sampay sepulu' buuki sungagen.

<sup>4</sup> Naa, kig libun kini, piselukan suub, metinggasi kepulanen. Miputus dadema pekayan bulawan, ngag bagabaga muka' nga perlas.\* Pegawid pa pagid tasa bulawan mipenu' penguinumen, sa'itada su nga mekepiidpiid gulaula kampu' nu kelaun melaat gulaula, sengku' nu kesumbangen. <sup>5</sup> Misulat dadema di gangaseni ngalan, laak igludi guluganen. Iini misulat, "Kig Babilonia, migdedengeg syudad, su gina' nu nga kelaun libun tebia' meglaa't pekesuunan sampay su nga menggulaula gininisan mekepiidpiid dinig dibabaw lubang kini." <sup>6</sup> Muka' minita'u kig libun kia, mibulek dig dugu' nu nga piglegetawan nu Megbebaya', sug dugu' nu nga getaw pi-patayen saba' nu kesakup nilan dini Isus.

Kali'u maita' sug libun, misebu'anu dun gupia. <sup>7</sup> Laak su sesugu'en nu Megbebaya' getaw langit, kali' saak dinaan, "Ta' mai misebu'an ka dun? Kig libun kia, pesuun ku pa dini'a su giglud guluganen sampay su gulugan nu

---

\* **17:4** 17:4 Ki perlas, ginis pekayan batu, gemptu', maita' diag dialem belelungan ginis budenay diag dagat.

sekayanen mekendekendek menamad, ki pitu buuki gulunen muka' sepulu'i sungagen. <sup>8</sup> Ki menamad kia minita' mu, gandang tetubu', laak nemun, minatay na. Laak sungu na gua' pelum ditug baya', adun mekangay ditu pektipuan dun tantu. Misebu'an duni nga getaw megbenwa dinig dibabaw lumbang nda' mesulati ngalan nilan dig linulun sinulat tanda' milista su ngalan nu getaw mpeduma di ketubu' nda'i tamanen, ki gandang na misulat su nda' pa mbaali gekleb langit bu' lupa'. Pu' su menamad, gandang tetubu', laak minatay na muka' metua' pa puli'."

<sup>9</sup> Laung padun nu getaw langit, "Naa, subay metelisebuten su getaw, subay duuni kekesu-unen, adun maulugen ini. Su pitu buuk gulu nu mekendekendek menamad, iin su pitu dungusan pegingkudan nug libun kia. Sala guluganen, pitu tawan gadi'. <sup>10</sup> Naa, su pitu tawan gadi' kia, lima tawan dinilan, nda' na. Su sala tawan dinilan, peglekaunutan pa nemun. Su sala pa, nda' pa metua'. Laak sa' mateng nain, ndi' dadema maibeni keglekaunutanen. <sup>11</sup> Ki mekendekendek menamad kiin, gandang tetubu' dayun minatay, iini kewalu adi'en, duma nu nga pitu tawan gadi'. Iin, peksungu ditu kepatayen nda'i gikteben.

<sup>12</sup> "Su minita' mu kia sepulu' buuk sungag nu menamad, iini sepulu' tawan gadi' pelum, laak ilan, nda' pailan pekpuun meglekaunutan. Begayan pailan pegbaya' megduma ilan di mekendekendek menamad meglegadi' taman laak sauras. <sup>13</sup> Salabuuk daig delendeman nu sepulu' tawan gadi'. Su ginuung nilan sampay su

pegbaya' nilan, begay nilan ditu mekendekendek menamad. <sup>14</sup> Megbunu' pailan ditu Nati Karniru, laak dagid daagen ilan nu Nati Karniru muka' nu nga sakupen, su nga pingenggaten, tindu'en muka' mibaal meseligan sakupen. Pu' ki Nati Karniru kini, iin su Meglekaunutan di nga kaunutan muka' Meglegadi' di nga gadi'."

<sup>15</sup> Laung padun dinaan nu getaw langit pegawid gaalanen, "Naa, ki minita' mu lawas tubig kia miktimalag ditu tanda' pegingkid sug libun tebia' meglaat pekesuunan, iini getaw di melaun bansa, di metiba' benwa, sampay di gininisan nasud muka' pikebitan. <sup>16</sup> Naa su pelum minita' mu sepulu' buuk sungag nu menamad, sa'itada su sepulu' tawan gadi' kampu' nu mekendekendek menamad, mesengay nilan gusay kig libun kia. Pengui'en nilan sug launan gimunen bena' melebasan laak iin. Aanen pa nilan padun su guneden dayun nilan tutungay su sama' dig libun kia. <sup>17</sup> Pu' pidelendem nu Megbebaya' dinilan pekpelassen nilan su mauya'anen. Sug bian dun, meksalabuuk ilan sampay megbegay ilan pegbaya' nilan meglekaunutan ditu mekendekendek menamad. Mekpetuud ilan ditu menamad, sampay megela' na menuud su tinalu' nu Megbebaya'."

<sup>18</sup> Diksu' nu getaw langit su tinalu'en dinaan, laungen, "Naa ki minita' mu kia libun tebia' meglaat pekesuunan, iin daan su migdedenggeg syudad migbaya' di nga kelaun gadi' dinig lumbang nemun."

# 18

## *Su Kegeba' nu Syudad Babilonia*

<sup>1</sup> Mendadi tubus nitu, duuni minita'u pelum sala sesugu'en nu Megbebaya' getaw langit peglusad dinig lumbang genat ditug langit. Iin, metaas gupiai pegbaya'en. Su tiagen, miti-agan dun sug liwenagan nig lumbang kini.

<sup>2</sup> Migbeksay dayun, kali' pektalu', "Migeba' na! Ki migdedengeg syudad Babilonia, migeba' na tu'u! Genat nandaw nda'i megbenwa dun, subay laak nga ginis menenulay sampay su kelaun ginis mekelemu' muka' mekesalasalala manuk-manuk. <sup>3</sup> Iini migeba' dun, pu' kig libun kia tebia' meglaat pekesuunan gitunganen su syudad, miginum di gembisa penguinemenen sug launan nasud, sa'itada di gayak nug libun dig dusa. Minlelingay dun su nga gadi' dig lumbang, muka' duminatu' gupia su nga nigusyanti puun tu ketagia nu melaat gayak nug libun."

<sup>4</sup> Mendadi iin pa pagidi tingeg midengegu ditug langit, kali' talu',

"Yamu nga piglegetawan ku, pegawa' amu dia syudad kia! Pegliaw niuig libun kia!

Iin, ndi' amu pekpedela'ig di sala'en, adun ndi' damu dema mpeduma di ginukuman pelebu'en ku diniin!

<sup>5</sup> Pu' su sala'en, tinalimpuk, misangku' ma tug langit,

pingebet na nu Megbebaya' su melaat betaden.

<sup>6</sup> Peglegetay niu iin sama gupia di kepeglegeten diniu.

Su pinggulaulanen diniu, suli'ay niu dua' pilu'.

Su penguinumen pi'inumen diniu, painumay niu  
 pelum iin  
 dig dua' pilu' pai kebisananen.

<sup>7</sup> Su ketaas nu kepetaasen dig lawasen muka' su  
 kemis nu kebetangen,  
 pesemaay niu dun su kegleget niu diniin muka'  
 su kelegenayen.

Lelayun pektelu'enen dig lawasen, laungen,  
 'Kini dau pegingkud maa' nug bai,  
 kana' dau dema balu,  
 kaas ndi'u na daan tu'u mbianan su nga kelege-  
 nay!'

<sup>8</sup> Kagina kiaig delendemanen, megela'en  
 mbianay sug launan pelabu' diniin dig  
 laga' sendaw laak.

Kinii pelabu' diniin, su meliget leduun, nga  
 kelegenay di ginaa, muka' gunus  
 sampay metutung di gapuy.

Pu' kiin, su Kaunutan Megbebaya' mengukum  
 diniin, tampusan metaasi ginuungen."

<sup>9</sup> Mendadi su nga gadi' dinig dibabaw lum-  
 bang mipeduma ditu melaat gayak nug libun  
 muka' ditu kegduasanen, sa' maita' nilan su gebel  
 nu ketutung diniin, megbeksay ilan mengaduy,  
 lamug nilan menembit. <sup>10</sup> Memegindeg ilan dia  
 melayu', pu' mendek ilan mbuus mpeduma ilan  
 ditu kelegenayen, muka' mektalu' ilan, "Apelai!  
 Mekelelaatlelaat! Ki syudad Babilonia kini,  
 migdedengeg gupia muka' migbaya' di melaun  
 nasud, dayun di sauras laak mibiananen na su  
 ginukuman diniin."

<sup>11</sup> Naa, su nga nigusyanti kia, mengelaw  
 dailan dema muka' melegenan ilan, pu' saba'

nda'idun nai menaluy ditu ngag degangan nilan. <sup>12</sup> Nda' nai menaluy bulawan, bulawan selapi', bagabaga sampay perlas. Nda' nai getaw menaluy penepeten, pia kenduta' pai kelengasen sug budabudanen, sa' gemputi', sa' gempula, sa' pekayan gupia. Nda'idun dademai menaluy melengas gayu muka' pimetang binaal gayu, tangu, muka' nga ginis putaw muka' tisa'. <sup>13</sup> Nda' na pagidi menaluy gelingag, nga page-mut, pelinan, penguinumen sa' lana, garina, trigo, baka sa' karniru, kebayu' muka' sekayan duunig ligiden, sampay getaw, sa'itada nga gulipen. <sup>14</sup> Pektelu'en pa pagid nu nga nigusyanti ditug libun gitunganen su syudad, laungen, "Su kelaun gayak mu gimu, mialep na. Su tiba'an ga'us mu sampay su kelengas nug lawas mu, migela' na mbeleng. Ndi' mu na maita' puli!" <sup>15</sup> Laak memegindeg dia melayu' su nga duminatu' puun tu kendagang nilan dia syudad kia, pu' mipati' ilan mendek mbuus mpeduma ilan di kelegenay nu syudad. Melegenan ilan muka' mengelaw ilan. <sup>16</sup> Kali' ilan talu', "Apelai! Mekelelaatlelaati syudad Babilonia kini, asa migdedengeg gupia sia! Kitegaman nu sakupen, mekseluk ilan melengas gupia penepeten, gemputi' sa' gempula, sampay megimakay ilan bitekel, baklaw muka' singkil bulawan, bagabaga muka' perlas. <sup>17</sup> Dayun laga' sauras, migela' gupia mbeleng dun su nga kelaun gimu nilan."

Naa, su ngag launan meguit pelum bangsa', su nga sumakay dun, su kelaun mengimbaal diag bangsa' sampay sug launan megleketubu' dig dagat, mimegindeg ilan dia melayu' di syudad,

18 muka' migbeksay, saanan nilan megbantay tu gebel nu ketutung diniin, kali' talu', "Genat pa dengantu nda'idun naig lain syudad mesama puli' di migdedengeg kini syudad!" 19 Igbudan nilan dayun gabu lupa' su gulu nilan muka' mik-tenlis ilan mengaduy, lamug nilan menembit, laung nilan, "Apelai! Mekelelaatlelaati migdedengeg syudad kini! Su ngag launan duunig bangka'en, duminatu' puun tu ga'usen. Dayun laga' sauras migela' mbeleng diniin su gikteb ga'usen."

20 Naa talu'u diniu, yamu nga getaw langit, penleliagen namu, pu' ki syudad kini, migeba' na! Yamu nga piglegetawan nu Megbebaya' dinig lubang, sampay yamu nga peneliganen muka' pimuunanen, penleliagen namu! Pu' su pinggulaula diniu nu syudad Babilonia, inukuman na nu Megbebaya'.

21 Mendadi, duun pelumi sesugu'en nu Megbebaya' getaw langit ginuungan gupia, minimud batu ma'niin bagel galingan, dayunen lebu'ay ditug dagat. Kali' talu', "Ki migdedengeg syudad Babilonia, ma'nini'i kegeba'en tekaw. Dayun ndi' na maita' puli'. 22 Ndi' na medengeg puli' dia syudad su tingeg arpa, bebat getaw, talu' lantuyan atawaka bugyung! Nda'idun demai panday mengimbaal dia, pia ta' tinawanay dun! Ndi' na puli' medengeg dia sug deguk galingan! 23 Ndi' na puli' maita' diaig lamag nu sulu', ndi' na padun medengeg dia su kabit nug beli'iin. Kiin, asa su nga mengnigusyu dia, daansama' moglekaunutan ilan di tibuuk benwa. Piglimbungan nilan su kelaun getaw dini tibuuk lubang

pibian di sagya pengemaw nilan.”

<sup>24</sup> Naa, ki syudad Babilonia kini, iini inukuman dun, pu' minita' diaig dugu' nu nga pimuunan nu Megbebaya' sampay su nga piglegetawanen, kampu' nug dugu' nu ngag launan pinatay diag dibabaw lumbang.

## 19

<sup>1</sup> Mendadi tubus nitu, duuni midengegu ma'niin nu gelang nu melaun gupia getaw mektalu' ditug langit. Kali' ilan talu', “Su Megbebaya', penalan ta! Mikpuun diniin su kegawen dinita, muka' iini megdedengeg gupia sampay ginuungan tandeng! <sup>2</sup> Metuud daan sug lumbus kengukumen, meglepeng gupia! Pu' inukumanen su migdedengeg kia libun tebia' meglaat pekesuunan, sa'itada su gembagel syudad Babilonia, pu' pegdaangan nug libun kia su tibuuk lumbang puun tug dusanen. Sinila' iin nu Megbebaya', pu' saba' pimatay nug libun su nga sesugu'enen kilawan.” <sup>3</sup> Dayun mimeksay puli' su melaun getaw ditug langit, laung nilan, “Penalan ta gusay su Megbebaya'! Su gebel nu mitutung syudad kia, ndi' gusay mpugyaw.” <sup>4</sup> Dayun kig dua' pulu' bu' paat tawan kia meglegulang kaunutan muka' su paat buuk tetubu' biwat, minginlulud ilan dia gedapan nu Megbebaya', su pegingkud dia melengas gingkudan gadi', muka' pigbesaan nilan iin dadema. Laung nilan, “Ma'antu daan! Penalan ta su Megbebaya'!”

*Su Kebibu ditug Bela'i nu Nati Karniru*



<sup>5</sup> Naa, duun dayuni midengegu miktalu' ditu melengas gingkudan gadi' kia. Kali' talu', "Yamu nga sesugu'enen muka' yamu nga kilawan, me-datu' gempusuk, adin su megbasa ditu niin, penalan ta su Megbebaya', su pektemuyen ta!"

<sup>6</sup> Bena' midengegu su tingeg nu melaun gupia getaw, ma'niin deguk nu gembagel baga atawaka metenug gupia delalak. Kali' ilan pektalu', "Penalan ta su Megbebaya'! Pu' su Kaunutan ta, su Tampusan ginuungan Megbebaya', mikpuun na tu'u Meglegadi'!" <sup>7</sup> Subay penleliagen ita dun gusay, penalan ta su ginuungan Diwata. Pu' minateng na su gendaw beli'iin su Nati Karniru. Su penginsuaanen, minuya' na. <sup>8</sup> Pu' bigayan na su penginsuaanen peselukan gemputi' penepe-tenen, mengelinggat saba' kelenu'en. (Ini gu-lugan nu penepeten kia, su gempia gulaula nu piglegetawan nu Megbebaya'.)

<sup>9</sup> Mendadi su sala tawan kia sesugu'en nu Megbebaya' getaw langit, miktalu' pelum dinaan, "Sulat mu ini. Yamu nga ginggat sumaup dig bela'i nu Nati Karniru kini, leliagen namu." Kali' dugang dun, laungen, "Kini gupia su metuud tinalu' nu Megbebaya'!"

<sup>10</sup> Dayunu miglaub di gedapan nu getaw langit kia, adun pegbesaan ku iin sia, dagid miktalu' dinaan, "Paa, ndi'a pa deli'. Sama sesugu'en mau muka' sama sesugu'en dau dema nu nga mimated dini'a, sampay su kelaun dumunut tu metuud ginukit ni Isus. Pegbesaay mu sungkin su Megbebaya'."

Pu' su metuud biwasan ni Isus, iin da tanan su pitalu' nu Megbebaya' tu nga pimuunanen.

*Ki Suminakay di Gemputi' Kebayu'*

<sup>11</sup> Mendadi minita'u sug langit mipuka' puli', muka' duuni gemputi' kebayu' dia. Ki peksakay dun, ngalanan si Meseligan, muka' si Metuud. Iin, su kengkumen muka' keglumpaken, mekebian di metuud. <sup>12</sup> Su matanen, ma'niin nug liga' gapuy. Di gulunen, melaun tundek. Misulatan iin di ngalanan, ki ngalan kia, iin da laak salaneni mekesuun dun. <sup>13</sup> Su suuben, mileep dugu'. Iini paingalan diniin, "Su Talu' nug Megbebaya'." <sup>14</sup> Tumindug diniin su nga sundalu dig langit, peksakay dailan dema gemputi' kebayu', piselukan dailan dema suub gemputi', mengelinggat saba' kelenu'en. <sup>15</sup> Mikseleput dig baba'eni mauteng gupia sundang, iini pekpendaagen tu nga nasud. Naa, sa' pendaagenen na, meglekaunutan dayun tu'u di nga nasud, peguiten dinilani sekud putaw. Peglaatanen ilan maa' nu getaw mekpees di gubas sa' megbaal penguinmen, pu' mangit dinilan gupia su Tampusan Ginuungan Megbebaya'. <sup>16</sup> Sinulat di suuben muka' di paanen ki gelalen kini, "Su Meglegadi' di nga gadi', su Meglekaunutan di nga kaunutan."

<sup>17</sup> Mendadi minita'u pelum sala tawan sesugu'en nu Megbebaya' getaw langit pegindeg dia mata gendaw. Pitikteganen gupia sebiay su kelaun manukmanuk peglayug dia gawanawan, laungen, "Pekpungun amu dini, saup namu dig lumpuk nu Megbebaya'. <sup>18</sup> Dini niu penganay su guned nu nga gadi' muka' nu nga kaunutan sundalu sampay su nga sundalu, su guned nga kebayu' sampay su suminakay dun, su guned nu

tiba'an getaw, sa' gulipen, sa' su kana' gulipen, datu' sa' gempusuk!"

<sup>19</sup> Naa mendadi, minita'u su mekendekendek menamad gandang guminawen kia dig dagat muka' su nga gadi' dinig lumbang sampay su kelaun sundalu nilan, mikpungun ilan gela', adun pembunu'en nilan ki peksakay di gemputi' kebayu' muka' su kelaun daniin sundalu. <sup>20</sup> Dayun daapay su mekendekendek menamad muka' su sala tawan kia tautau pimuunan nu Megbebaya', su minggulaula nga mekesalebu' di pegita'en nu menamad. \* (Miksekat di nga mekesalebu' kia, piglimbungan nu tautau pimuunan su nga getaw mitu'usan nu mekendekendek menamad, sampay sug lumaun miktamuy tug ledawanen.) Linabu' dayun ditug linaw gapuy su mekendekendek menamad muka' su tautau pimuunan nu Megbebaya' tetubu' pa, su gapuy lamug asupre ndi' mpaleng. <sup>21</sup> Pinatay dayuni nga sundalu nilan di sundang, su sundang mikseleput diag baba' nu peksakay gemputi' kebayu', muka' pingaan nug lumaun manukmanuk su guned nilan taman mibesug ilan.

## 20

### *Su Sengibu Taur*

<sup>1</sup> Mendadi duun pelumi minita'u sesugu'en nu Megbebaya' getaw langit, peglusad. Duuni peguitenen, ki gunsai' inandam ditug baya', muka'i

---

\* **19:20** 19:20 Ki tautau pimuunan nu Megbebaya' kia, iin su kedua' menamaden, su gumiwa' dig lupa'.

gembagel lantaylantay. <sup>2</sup> Ki gembagel metetubu' ma'niin palas buaya, sug dengantu gilal mamak, sa'itada su Palin atawaka si Satanas, iin, binalud dayun nu getaw langit lantaylantay taman sengibu taun. <sup>3</sup> Pu' linabu' nu getaw langit ditug baya', dayunen tekepay muka' piligenanen sampay metektaki sengibu taun kiin, adun ndi' mekelimbung puli' di nga kilawan dini tibuukan benwa. Naa, sa' metektak nai sengibu taun, beluyen pa puli' su Palin ndi' maiben.

<sup>4</sup> Mendadi minita'u dayuni nga gingkudan gadi' muka' su nga pemegingkud dia. Ki nga pemegingkud dun, bigayan ilan pegbaya' tu kengukum. Minita'u pa padun su nga gimud nu nga getaw pimumukan gulu, saba' nilan megukit ditu metuud biwasan ni Isus muka' tu talu' nu Megbebaya'. Ilan kini, nda' nilan pektemuyay su mekendekendek menamad atawaka sug ledawanen. Nda' da nilan dema pesulatay di ngalaneni gangas nilan atawaka kemet nilan. Mendadi ki nga piputukan gulu kia, pitubu' ilan puli'. Migduma ilan dayun dini Kristu meglekaunutan taman sengibu taun. <sup>5</sup> Naa, su kepetubu' dinilan puli', iin sug bekna ketubu' puli'. (Laak, su sama' nu nga getaw gandang mimatay, nda' pailan metubu' puli', sampay metektubi sengibu taun.) <sup>6</sup> Naa tumu', su mipeduma dig bekna ketubu' puli' kini, su gempantek mipaas nailan nu Megbebaya', penleliagen ilan gupia. Ndi' ilan mpeduma di kedua' kepatay, sa'itada ndi' ilan puli' melegenan. Mbaal ilan dayun ngag belian nu Megbebaya' muka' ni Kristu. Megduma dailan dema dini Kristu melegadi' taman

sengibu taun.

### *Dinaag su Palin*

<sup>7</sup> Naa mendadi, kini si Satanas, bena' mpapas na su sengibu taun, beluyen iin ditu pirisuan dun. <sup>8</sup> Mpanaw dayun tu kelaun nasud misigwag di tibuuk lumbang, adun peglimbunganen su ginsekupan nu nga nasud. Paingalan dun su nga nasud kia, Gog muka' Magog. Pungunen dayun su ginsekupan nu nga nasud, adun meglegubat ilan. Ndi' ilan mbilang saba' kelaunen, gitungan dun sug lubek dia geksid dagat. <sup>9</sup> Naa sa' mpungun nailan, mesigwag ilan pakayaw diag liwenagan benwa, pu' adun pegalidungan nilan su pegbebelayan nu piglegetawan nu Megbebaya' sampay su syudad kia pitail nu Megbebaya'. Dagid duun pelumi gapuy melabu' genat ditug langit sumapul di nga nasud. <sup>10</sup> Dayun ki Palin meglimbung di nga nasud, pelebu'en na tu'u ditug linaw gapuy lamug asupre, dia tanda' gandang bileng dadema su sala tawan tautau pimuunan nu Megbebaya' muka' ki mekendekendek menamad. Dayun ilan peglegetay ditu gebii gendaw di nda'i tamanen, ki tautau pimuunan nu Megbebaya' muka' su mekendekendek menamad, ketelunen su Palin si Satanas.

### *Su Katapusan Ginukuman*

<sup>11</sup> Naa tubus itu, duuni minita'u gembagel gupia gingkudan gadi', gemptu', muka' minita'ui pegingkud dia. Mendadi ki pegingkud kia, mitekaw mawa' ditu gedapanen su gekleb langit bu' lupa' sampay mialep ilan gupia. Nda' nailan puli' maita'. <sup>12</sup> Naa, minita'u pa pagid sug launan

mimatay, datu' muka' gempusuk, pemegindeg ilan dia mesungu'an nu gingkudan kia. Bimbal dayuni ngag linulun sinulat. Bimbal pa pagidi sala sinulat, kig linulun sinulat tanda' milista su ngalan nu nga getaw mpeduma di ketubu' nda'i tamanen. Inukum dayun su nga mimatay, inukuman ilan mbantang tu gulaula nilan misulat na dia ngag linulun sinulat kia. <sup>13</sup> Pu' su nga mimatay pelum diag liwenagan dagat, ditu gumul sampay su ngag ditug baya', mimenggua' ilan ditu. Ki tiba'an nilan, inukuman mbantang tu gulaula nilan. <sup>14</sup> Mendadi ki gumul muka' kig baya', linabu' na tu'u ditug linaw gapuy. (Kig linaw gapuy kini, ma'ananen su kedua' kepatay, su kepatay nda'i tamanen.) <sup>15</sup> Dayun lebu'ay ditug linaw gapuy su kelaun getaw, adin su nda' mesulati ngalanen dig linulun sinulat kia tanda' milista su ngalan nu nga getaw mpeduma di ketubu' nda'i tamanen.

## 21

### *Sug Begu Langit muka' su Begu Lumbang*

<sup>1</sup> Mendadi minita'u dayun kig begu langit muka' lumbang, pu' mibeleng sug daan langit muka' lumbang, sampay mialep sug dagat. <sup>2</sup> Minita'u pa pagidi Syudad Pinaas nu Megbe-baya', kig begu Jerusalem, peglusad dig begu lumbang genat ditug langit, genat tu Megbe-baya', minuya' na gupia, ma'niin nug libun piselukan pekayan pu' sungu beli'iy, minuya' na mekita' ditu menginsawa dun. <sup>3</sup> Midengegu dayuni mesekeg talu' ditu gingkudan gadi', kali'

taluh, “Ki Megbebaya', mekpungun na di nga kilawan megbenwa! Iin, sumala na dinilan megbenwa, muka' ilan, mbaal ilan gegulingen piglegetawanen. Meksalabuuk gupia dinilan su Megbebaya', muka' iin, pektemuyen nilan na tu'u. <sup>4</sup> Pengua'enen dinilanig launan mekpauba' di ginaa nilan. Genat itu nda'idun nai matay, nda'iduni melegenan, nda' nai mengaduy atawaka mesaitan. Su miuna kebetang getaw, megela' na mpalus.”

<sup>5</sup> Mendadi su megingkud dia melengas gingkudan gadi', kali' taluh, “Bentayay pa daan, ki gikteb biwatu, gela'en ku sukliay begu!” Kali' padun pektaluh' dinaan, “Sulat mu ini, pu' ki tinaluh' kini, metuud muka' meseligan gupia.” <sup>6</sup> Dayun dinugangen dun, laungen, “Migela' na metubus! Naa naani miuna, naan dademai mbinaya'. Naan, su nda'idun pai mibaal, daan nau. Sa' megela' na mpapas sug launanen, kini pau gusay. Naa, adin su kuaun, painumen ku dun ki tubig kini genat di tebud nu ketubuh' nda'i tamanen, di nda'ig bayaden. <sup>7</sup> Adin su mekegdaag di melaat, iini petenged diniin, pektemuyenu niin muka' iini mbaal bata'u. <sup>8</sup> Laak dagid su nga mpiid sumakup dinaan, su nga tumipu di samatawen, su nga menggulaula mekepiidpiid, su nga memunu'an, su nga meksumbang, su nga mensaled, su nga mektamuy tu sagya diwata sampay su taman belusen, iin sungkini gasal nilan, mpegbenwanan nilan sug linaw gapuy milemugan asupre, sa'itada su kedua' kepatayen.”

### *Kig Begu Jerusalem*

<sup>9</sup> Naa mendadi, mikpesempel pelum dinaan su sala tawan di nga pitu tawan sesugu'en nu Megbebaya' getaw langit kia piguidan nilan su pitu buuk gaalan mipenu' di katapusan pitu ginis pelabu' kia, kali' talu', "Diniin ka, pu' paita'u dini'a kig bimbeng nu Nati Karniru, su penginsuaanen." <sup>10</sup> Sa' ma'antu, pingepu'anu nug Balakat nu Megbebaya', muka' iwitu nu getaw langit ditug dungus nu metaas bentud. Bena' minateng ami, pinita'en dayun dinaan su Jerusalem, ki Syudad Pinaas nu Megbebaya'. Ki syudad kini, peglusad genat ditug langit, ditu Megbebaya'. <sup>11</sup> Mekesulaw puun tu kelengas nu Megbebaya', tumiag daan ma'niin meting-gas batu, maa' nu piningalan dun haspe, sala penenggi'an duni pagalungan, saba' ketinawen. <sup>12</sup> Duuni gembagel dendingen, metaas dadema, sepulu' bu' dua'i genga'anen. Duun dademai sepulu' bu' dua' tawan getaw langit megingat di ngag bisuanganen. Misulat dia ngag bisuangan kia su ngalan nu nga sepulu' bu' dua' bansa nu getaw Israel. <sup>13</sup> Ma'antu, kada sepesagi' nu syudad, telu buukig bisuanganen, telu buuk diin dapit silangan, telu buuk dadema diin dapit gilidan gendaw dibaluy bu' dibaluy, muka' telu buuk pa pagid dia dapit sindepan. <sup>14</sup> Duun pa pagidi sepulu' bu' dua' buuk gembagel bagabaga intudan nug dendingen. Ki ngag bagabaga kia, misulatan pelum tu nga ngalan nu sepulu' bu' dua' tawan peneligan nu Nati Karniru.

<sup>15</sup> Naa su getaw langit migyaga dinaan, duuni sekuden, bulawan, iini pektepengen tu syudad



kini, tu ngag bisuanganen sampay ditug dendingen. <sup>16</sup> Memesagi'i syudad kini, miksamaig beklanganen muka' yeba'anen. Naa tipeng tu'u nu getaw langit ki syudad kini. Sug yeba'anen, selaksa' bu' dua' ngibu istagya (sa'itada, dua' ngibu bu' paat gatus kilumitru), beklanganen muka' taasen miksama dig yeba'anen. <sup>17</sup> Tipeng dadema nu getaw langit sug dending, megatus bu' paat pulu' bu' paat kubita (sa'itada, telu pulu' bu' enem depa) su taasen mekatag dig betad kilawan mektepeng, pu' kiai ginamit nu sesugu'en kia nu Megbebaya'. <sup>18</sup> Sug dendingen, binaal bagabaga piningalan dun haspe. Su syudad, iini pengimbaalanen, lungkan bulawan, kaas metinggas ma'niin metinaw pagalungan. <sup>19</sup> Su nga sepulu' bu' dua' buuk batu gintudan diag dending nu syudad kia, pimulakmulakan siba' ngag bagabaga. Sug bekna gintudanen, binaal haspe, su kedua' gintudanen, binaal sapiro, su ketelunen, agata, su kepaaten, esmeralda, <sup>20</sup> su kelimanen, onise, su ke'enemen, kornalina, su kepitunen, krisolito, su kewalunen, birilo, su kesiamen, topasyo, su kesepulu'en, krisopraso, su kesepulu' bu' salanen, hasinto, sampay su kesepulu' bu' dua'en, amatista.\* <sup>21</sup> Ki sepulu' bu' dua' buuk bisuanganen kini, lumbus perlas pengimbaalanen, piksalabuuk binaal salabuuk tibuuk perlas. Sug dalan kumitas dia syudad, binaal tibuuk metinggas bulawan ma'niin metinaw pagalungan.

---

\* **21:20** 21:20 Kig batu kini, lumbus metinggas batu, pigininisani patiken, metegas dadema gupia.

<sup>22</sup> Naa mendadi, ki syudad kini, nda'u maita'ig Balay Penedapan tu Megbebaya' dia, pu' dia na gupia su Kaunutan ta Megbebaya', su Tampusan Ginuungan, muka' su Nati Karniru. <sup>23</sup> Ndi' na kambat tuiagi gendaw dia, mesama daig bulan, ndi' dadema kambat tuiag dia, pu' medelagan gupia su syudad nu kelengas nu Megbebaya', su Nati Karnirui sulu' mekpedelag dun. <sup>24</sup> Sug bianan nu nga getaw di kelaun nasud dinig lumbang kini, medelagan nu tiag nu syudad. Su nga gadi' pa pagid dinig lumbang, penguiten nilan dia su nga gimu nilan. <sup>25</sup> Sug bisuan-gan, mipuka'an gebii gendaw, ndi' na puli' tekepen. Pu' ndi' na meglegebii dia. <sup>26</sup> Adin su migdedengeg di nga nasud sampay su ga'us nilan, penguiten gela' dia syudad bian pegbasa tu Megbebaya'. <sup>27</sup> Laak dagid, taman talu'u diniu, nda'iduni milemu'an mekeseled dia syudad, sa' su minggulaula mekepiidpiid sampay sug belusen. Iin laaki mekeseled dia, su nga getaw milista nai ngalan nilan dig linulun sinulat nu Nati Karniru, ki sinulat tanda' milista su ngalan nu nga getaw mpeduma di ketubu' di nda'i tamanen.

## 22

<sup>1</sup> Mendadi pinita' pagid dinaan nu sesugu'en nu Megbebaya' getaw langit kig lawas tubig megbegay ketubu' nda'i tamanen. Metinggasi tubig kini ma'niin pagalungan. Su gulunen, iin su gingkudan kia nu Megbebaya' muka' nu Nati Karniru, <sup>2</sup> dayun dia menelegan titenga' nu karsada di syudad. Miktimpang di tubig

kia ki gayu megbegay ketubu' nda'i tamanen. Betad nu gayu kini, tauntaun sepulu' bu' dua' deksu' memunga, sa'itada, mainsan sebulan. Sug daunen, gempia bulung peneguli' di getaw tu kelaun nasud. <sup>3</sup> Nda'iduni getaw maita' dia syudad kia tinuyudan nu Megbebaya', pia sala tawan.

Naa, su Megbebaya' muka' su Nati Karniru, dia syudad kia su melengas gingkudananen. Dia mektamuy diniin su nga sesugu'enen, su nga getaw langit, sa' su nga kilawan. <sup>4</sup> Su mulu'en, maita' gupia nu ginsekupanen kia, sulaten dadema dia gangas nilan su ngalanen. <sup>5</sup> Nda' nai gebii. Ndi' na dema kambat gemiteni sulu' dia sampay ndi' na kambat medelagan nu mata gendaw, pu' su Kaunutan Megbebaya'i mekpedelag di syudad. Su nga sesugu'enen, getaw langit sa' kilawan, meglekaunutan ilan di nda'i gikteben.

### *Su Kelusad puli' ni Isukristu*

<sup>6</sup> Naa mendadi, su sesugu'en nu Megbebaya', kali' pektalu' dinaan, “Ki nga tinalu' kini, metuud tantu muka' meseligan gupia. Su Kaunutan Megbebaya', su mikpepengapu' Balakaten ditu nga pimuunanen, iin, sinugu'en su sesugu'enen getaw langit adun buasanen di nga sesugu'enen kilawan su sungu mpenggulaula.”

<sup>7</sup> Kali' talu' si Isus, “Pektalntenay niu ini! Ndi' maiben matengu! Su nga mekpetuud tu sinulat pedaan dig libru kini mpenggulaula lema' denlag, naa leliagen ilan!”

<sup>8</sup> Naa, naan si Juan, mikedengegu gupia muka' mikaita'u di kelaun mipenggulaula kini. Naa

benal mitubusu medengeg muka' maita' sug launanen kini, mikeglaubu dayun di gedapan nu getaw langit kia, su mikpaita' dinaan di kelaunen kini, pu' pektemuyen ku sia iin. <sup>9</sup> Laak dagid laungen dinaan, "Paa, ndi'a dema tu'u pengma'niin, pu' sama mau sesugu'en, sama sesugu'en dau dema nu nga mimated dini'a pimuunan nu Megbebaya', sampay su tiba'an mekpetuud tu sinulat dinig libru kini. Tamuy mu sungkin su Megbebaya'!" <sup>10</sup> Laungen padun dinaan, "Kini nga sinulat pedaan mekatag di mpenggulaula lema' denlag, ndi' mu pegbuniay, pu' sungu na menuud kig launanen kini. <sup>11</sup> Mendadi, adin su getaw menggulaula melaat, iin na gusayi penggulaulaanen. Adin su menggulaula mekepiidpiid, iin nai penemalannen. Su mekesuun dema, mekenamal dadema meksikesuun, sampay su pinaas nu Megbebaya', ki pigbetaden su laak mauya'an nu Megbebaya', naa pediunen gusay su kepaas dun."

<sup>12</sup> Kali' pektalu' si Isus, "Pektalentenay niu ini! Ndi' maiben matengu puli'! Uiten ku su nga sugda tu nga getaw, diadia mbantang tu pinggulaulanen. <sup>13</sup> Naa naan, su nda'idun pai mibaal, daan nau. Sa' megela' na mpapas sug launanen, naan, kini pau gusay. Naani pikpuunan nug launan, naan dademai katapusanen. Naani miuna, naan dademai mbinaya'."

<sup>14</sup> Penleliagen su nga getaw pengekdakan nilan gupia su suub nilan, kaas buangen dinilan, mbantang nailan maan tug bunga nu gayu megbegay ketubu' nda'i tamanen, mbantang dailan dema mian dig bisuanganen, adun suled ilan tu

syudad. <sup>15</sup> Dagid su nga menggulaula mekepi-idpiid, su nga mensaled, su meksumbang, su memunu'an, su mektamuy tug ledawan sampay su meglimbung muka' sug belusen, ditu laak ilan liu nu syudad.

<sup>16</sup> “Naa, naan kini si Isus, sinugu'u su sesugu'en ku, adun su gempenggulaula kini, ukitenen diniu nga pikumpungan nu suminakup dinaan. Naan su sapu' ni David paingalan dinaan su pemulaw, ki tampusan mekesulaw bitun.”

<sup>17</sup> Mendadi, sug Balakat nu Megbebaya' muka' su penginsuaan kia nu Nati Karniru, kali' ilan talu', “Naa, diniin ka na tu'u!”

Naa, adini mekedengeg dun ini, subay telu'enen dadema, “Diniin ka tu'u, uu Kaanutan!”

Diadia, adin diniui kuaun, diaan ka niin, alap mu tu'u ki tubig megbegay ketubu' nda'i tamanen, kig begay dini'a di nda'ig bayad dun. Pia adin su meliag dun, malap dun.

### *Deksu'anen*

<sup>18</sup> Naan si Juan, pegaden ku daan su kelaun mekedengeg di mpenggulaula lema' denlag, ki sinulat pedaan dig libru kini. Sa' duuni getaw dumugang dun dini, pia sektaang talu', dugang nu Megbebaya' di ginukuman dun su nga pelabu' sinulat dig libru kini. <sup>19</sup> Mesama sa' duuni getaw kulanganen ki sinulat pedaan di mpenggulaula kini lema' denlag, pia sektaang talu' laak, naa, ui'en dadema diniin nu Megbebaya' su gilasen dig bunga nu gayu kia megbegay ketubu' nda'i

tamanen, sampay sug bentanganen suled dia Pinaas Syudad sinulat dig libru kini.

<sup>20</sup> Mendadi si Isus, su meglegintuud dun kig launanen kini, kali' talu', "Metuud! Sungu nau tu'u metua!"

Ma'antu! Uu Kaunutan Isus, diniin ka na!

<sup>21</sup> Naa penenebiin ku, kig launan getaw, diadia tulungen lelayun nu Kaunutan ta si Isus.

**Kig Begu Pasad: Ki talu' nug megbebaya'  
(Bagong Tipan: Maayong balita alang  
kanimo)**

**Subanen, Central: Kig Begu Pasad: Ki talu' nug  
megbebaya' (Bagong Tipan: Maayong balita alang  
kanimo) New Testament**

copyright © 1993 Wycliffe Bible Translators, Inc.

Language: Central Subanen

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 22 Feb 2024 from source  
files dated 29 Jan 2022

e39efc58-c45f-53c6-990e-d3cd833e20b4